

東  
華  
續  
錄

光緒二百

臣朱壽朋敬編

臣汪錫增恭校

夏四月戊戌朔時享 太廟 上親詣行禮○己亥諭政務處學部會奏遵議裁撤學政請設直省提學使司一摺現在停止科舉專辦學堂所有學政事宜自應設法變通著即照所請各省改設提學使司提學使一員統轄全省學務歸督撫節制一切詳細官制及辦事權限章程仍由學部籌議具奏所有各省學政一律裁撤均著回京供職各該省學校事宜暫由各該督撫督飭學員妥為經畫餘著照所議辦理○商部法律大臣等奏前准軍機處交片內開光緒二十九年十一月十一日奉 上諭商務商律現已設有商部即著責成該部詳議妥訂等因欽此當經 臣部趕速先擬商律之公司一門奏准頒行並聲明此外各律仍由 臣等次第擬訂奏明辦理在案竊維商律之有公司一門所以使已成之商業咸得有所維護乃或因經營未善或因市價不齊即不能不有破產之事而狡黠者往往因緣為奸以致弊端百出貽害無窮故刑部於光緒二十五年十月間議覆前兩江督 臣劉坤一奏奸商倒騙請照京城錢鋪定例分別辦理摺內申明治罪專條自枷杖以至軍流及永遠監禁蓋謂近來商情變幻倒騙之局愈出愈奇

必如此嚴懲庶奸商知所畏服然詐僞倒騙者之出於有心與虧蝕倒閉者之出於無奈雖皆謂之破產而情形容有不同詐僞倒騙洵屬可恨虧蝕倒閉不無可原若僅以懲罰示儆之條預防流弊而無維持調護之意體察下情似於保商之道猶未盡也茲經臣等督飭司員調查東西各國破產律及各埠商會條陳商人習慣參酌考訂成商律之破產一門由舉釐清理以迄還債銷案尤注重於倒騙情弊為之分別詳議監禁罰金等項罪名脫稿後咨送法律大臣臣家本臣廷芳會同商定都凡九節六十九條繕具清冊恭呈 御覽如蒙 俞允卽作為 欽定之本由臣部刊刻頒行各直省將軍督撫都統府尹一體遵照嗣後遇有倒閉案件卽無須援引刑部前奏比照京城錢鋪之例辦理以免兩歧而昭公允抑臣等查東西各國破產律有專為商人而設者有不專為商人而設者臣部實在保商而此項破產之律本與民人有相關之義今中國民法尙未訂定其有雖非商人破產之案除依臣家本臣廷芳編訂之訴訟法辦理外其餘未賅載者應准地方官比照本律辦理是以臣部所訂破產律准令民間財產赴商會註冊以備稽查仍責成地方官擢行法之關鍵而以商會副之結案後由地方官詳咨臣部查核其有關係名者並俟年終時彙咨刑部存案俾昭慎重各省凡有破產之案各督撫應嚴飭地方官定期完結不得耽於稽習視錢債為細故以仰副盛次 諭旨殷殷詰誡之至意得 旨如所議行○諭朕欽奉 慈禧端

佑康頤昭豫莊誠壽恭欽獻崇熙皇太后懿旨舊金山地震被災華民甚衆朝廷深爲軫念籌撥給帑銀四萬兩由外務部迅速匯往並傳知梁誠妥爲賑慰毋任失所○沈家本等奏法律一道因時制宜大致以刑法爲體以訴訟法爲用體不全無以標立法之宗旨有用不備無以收行法之實功二者相因不容偏廢是以上年臣等議覆御史劉彭年停止刑訊摺內擬請先行編輯簡明訴訟法等因奏明在案查中國訴訟斷獄附見刑律沿用唐明舊制用意重在簡括摺諸今日情形亟應擴充以期詳備泰西各國訴訟之法均係另輯專書復析爲民事刑事二項凡關於錢債房屋地畝契約及索取賠償者隸諸民事裁判關於叛逆僞造貨幣官印謀殺強劫竊盜詐欺恐嚇取財及他項應遵刑律定擬者隸諸刑事裁判以故斷弊之制秩序井然平理之功如執符契日本舊行申律維新而後踵武泰西於明治二十三年間先後頒行民事刑事訴訟等法卒使各國僑民歸其鈴束藉以挽回法權推原其故未始不由於裁判訴訟咸得其宜中國華洋訟案日益繁多外人以我裁判與彼不同時存歧視商民又不諳外國法制往往疑爲偏袒積不能平每因尋常爭訟細故釀成交涉問題比年以來更僕難數若不變通訴訟之法縱令事事規仿極力追步真體雖充大用未妙於法政仍無濟也中國舊制刑部專理刑名戶部專理錢債田產微有分析刑事民事之意若外省州縣俱係以一身兼行行政司法之權官制攸關未能驟改然民事刑事性

領各異雖同一法庭而辦法要宜有區別等從事編輯悉心比絜考歐美之規制欸目繁多於中國之情形未能盡合謹就中國現時之程度公同商定簡明訴訟法分別刑民事探討日久始克告成惟其中有所爲各國通例而我國亟應取法者厥有二端一宜設陪審員也考周禮秋官司刺掌三刺之法三刺曰訊萬民必萬民皆以爲可殺然後施上服下服之刑此法與孟子國人殺之之旨隱相照合實爲陪審員之權輿秦漢以來不開斯制今東西各國行之實與中國古法相近誠以國家設立刑法原欲保良醫而警凶頑人情誦張爲幻司法者一人知識有限未易周知宜賴衆人爲之聽察斯真僞易明若不肖刑官或有賄縱曲庇任情判斷及舞文誣陷等弊尤宜糾察其是非擬請嗣後各省會並通商領事及會審公堂延訪紳富商民人等造具陪審員清冊遇有應行陪審案件依本法臨時分別試辦如地方僻小尙無合格之人准其暫緩俟教育普及一體舉行庶裁判悉秉公理輕重得協與詳自無枉縱深故之虞矣一宜用律師也按律師一名代言人日本謂之辯護士蓋人因訟對簿公庭惶悚之下言詞每多失措故用律師代理一切顧問對詰覆問各事宜各國俱以法律學堂畢業者給予文憑充補是職若遇重大案件則由國家發予律師貧民或由救助會派律師代伸權利不取報酬補助於公私之交實非淺鮮中國近來通商各埠已准外國律師辯案甚至公署問亦引諸顧問之列夫以華人訟案藉外人辯護已覺扞

格不通即使遇有交涉事件請其伸訴亦斷無助他人而抑同類之理且領事治外之權因之更形滋蔓後患何堪設想擬請嗣後凡各省法律學堂俱培養律師人材擇其節操端嚴法學淵深額定律師若干員卒業後考驗合格給予文憑然後分撥各省以備辦案之用如各學堂驟難造就就即遴選各該省刑部之合格者撥入學堂專精斯業俟考取後酌量錄用並給予官階以資鼓勵總之國家多一公正之律師即異日多一習練之承審官也以上二者俱我法所未備尤爲挽回法權最要之端是以一併彙入綜計全編分爲五章凡二百六十條敬請續具清單恭呈 御覽如蒙 俞允並請明降 諭旨宣布中外一體遵行至刑法民法等項容俟陸續編纂成書隨時奏聞 上諭軍機大臣等修律大臣沈家本等奏刑民事訴訟各法擬請先行試辦一摺法律關係重要該大臣所纂各條究竟於現在民情風俗能否通行著該將軍督撫都統等體察情形研究其中有無扞格之處即行縷析條分據實具奏原摺單均著發給閱看將此諭令知之○商部奏臣部於本年正月間具奏粵紳籌辦新甯鐵路擬准先行立案摺內聲明當由臣等將原訂章程詳加核定飭令迅速勘辦各等語奉 旨允准業經分行欽遵並准兩廣總督岑春煊咨送此項章程請核定奏明立案等因到部臣等伏查造路係地方公益之舉該總理陳宜禧向在美國金山等埠辦理鐵路閱歷甚深茲特招集華僑鉅款回華籌辦用意洵堪嘉尚所有勘路定綫集

款招股購地興工用人理財各節諸關重要既須聯絡羣情尤宜分清權限自應妥訂章程俾有遵守當將原訂章程詳細察核悉遵臣部迭次奏准公司律鐵路章程及各省商辦鐵路成案參酌訂定二十一條均屬妥協謹開具清單恭呈 御覽如蒙 俞允卽由臣部咨行兩廣總督諄飭地方官切實保護嗣後公司事宜均令照章由股東議決總理等依次施行以專責成而重路政得 旨如所議行○庚子慈福端佑康頤昭豫莊誠壽恭欽獻崇熙皇太后 皇上御勸政殿日本國使臣內田康哉覲見○辛丑諭袁世凱奏遵旨校閱陸軍第二鎮一摺據陳此次校閱各項情形頗屬精嫻成效漸著深堪嘉許仍著練兵處王大臣等督飭認真訓練力求精進月異日新逐漸擴充悉成勁旅用副朝廷修明武備振厲戎行之至意餘著練兵處妥核辦理○戶部奏光緒三十二年三月十七日內閣鈔出署兩江總督周馥等奏蘇省銀價驟漲請將各屬所收規復銀價暫行撥還以資津貼一摺三月十五日奉 硃批戶部知道欽此欽遵鈔出到部據原奏內稱蘇省各州縣徵收上下忙錢糧向係按照市價隨時酌定同治四年奏定每銀一兩連公費折收錢二千文至七年銀價昂貴每兩易錢近一千七百文始折收錢二千二百文十年銀價更漲每兩易錢一千八百餘文乃折收錢二千四百文光緒三年銀價仍復每兩二千文之舊近數年來銀價無甚上下悉仍其舊惟二十八年因賠款急迫奏明規復銀價每兩加收錢二百文由

經徵之員專款解司抵還賠款各屬折價仍折收錢二千文上年銀價驟漲數月之間每兩易錢由一千四百餘文漲至一千六百八九十文而各屬折價仍每兩二千文其書吏辛工差保盤費飯食傾銘火耗解費近又另有奉提報撥之三四五分平餘以及常年辦公經費靡不取給於羨餘銀價一漲不敷抵支疊據各州縣聯銜具稟有請免解規復者有請免提平餘公費者接連而至蘇省徵收折價向照市價爲似即現在銀價既與同治七年相等擬量予變通請將隨徵規復銀價自光緒三十二年起撥還各州縣計每兩折銀二千二百文其抵解賠款銀兩照浙江每兩帶徵錢三百文之案蘇省仍照前案每兩另行帶徵賠款錢二百文等語臣等竊查立政首在恤民妨民莫如加賦我朝深仁厚澤取民有制雖兵興以來軍食餉項何一不借資於民而地丁錢糧則未聞於正供之外別有加派誠以民爲邦本保民卽以保邦也光緒二十八年督劉坤一以賠款甚迫奏請規復同治七年銀價每兩加收錢二百文由經徵之員專款解司以抵賠款各屬仍收折價錢二千文此雖一時權宜究係規復舊價而於額徵之數並未絲毫加增今該督等以銀價驟漲請將規復之二百文自光緒三十二年起撥還各州縣縣其抵還賠款請照浙江帶徵之案每兩另行帶徵二百文等因是從前因賠款甚急而規復銀價今因調劑屬員而另取於民致令國家受厚斂之名黎庶增無窮之累而凡各州縣則坐收現成之利以



餉其案撥情度理豈得謂平且據稱同治七年銀價每兩易錢一千七百文十年每兩易錢一千八百餘文今市價每兩易錢一千六百零是銀價較七十年均低則各屬每兩所收二千文當可足敷抵支何必以規復於民者歸之官而另行加收二百文以累民乎現又據該督奏請暫免限制銅元鑄數摺內聲稱本省應用銅元目前尚在短絀之時未至充溢之候衝衡現應積之象偏僻則仍不見有銅元若遽限制鑄數民間又將有錢荒之虞等語是該省尙慮錢荒而以一時一地之偶異遂謂銀價驟漲殊非定論至平餘公費乃盤剝中飽各省皆然浙江雖因賠款帶徵三百文然無規復之案更不得援以爲例總之錢法不修官民交困官困厚取於民民困將何所訴也等公同商酌擬請 旨飭下兩江總督江蘇巡撫蘇省本年徵收錢糧折價並規復賠款照常徵解其撥還各屬及另行帶徵二百文應不准行請 飭令將錢法因時制宜竭力整頓酌盈劑虛以適於平則官民均受其益而無取乎加賦矣得 旨如所議行

○唐紹儀與英國使臣薩道義訂藏印正約成其文曰 第一款 光緒三十年七月二十八日英藏所立之約暨其英文漢文約本附入現立之約作爲附約彼此允認切實遵守並將更訂批准之文據亦附入此約如遇有應行設法之時彼此隨時設法將該約內各節切實辦理 第二款 英國國家允不佔併藏境及不干涉西藏一切政治中國國家亦應允不准他外國干涉藏境及其一切內治 第三款

光緒三十年七月二十八日英藏所立之第九款內之第四節所聲明各項權利除中國獨能享受外不許他國國家及他國人民享受惟經與中國商定在該約第二款指明之各商埠英國應得設電綫通報印度境內之利益 第四款 所有光緒十六十九年中國與英國所定兩次藏印條約其所載各款如與本約及附約無違背者概應切實施行 第五款 此約分繕中文英文業已細校相符惟辯解之時仍以英文為準 第六款 此約須由兩國大皇帝批准畫押自兩國全權大臣畫押之日起限三箇月在倫敦互換此約中文英文各繕四分共八分兩國全權大臣畫押蓋印為憑 附約 光緒三十年七月二十八日即西歷一千九百零四年九月初二日在拉薩定立英藏條約又印度總督代英國政府簽字所聲明之款附於已經批准之光緒三十年七月二十八日即西歷一千九百零四年九月初七日所訂立英藏條約之內 英藏條約 案查光緒十六十九年中國與英國所定兩次英藏條約因其意義並切實施行均有疑難之處又查英藏歷年和好近因事故情意未洽今欲重修舊好將所疑難之事全行解定茲大英國政府特派邊務全權大臣榮赫鵬與噶爾丹寺長羅生曼爾會暨噶布倫並色拉別蚌噶爾丹三大寺之呼圖克圖兼與西藏民教諸首領代表西藏議定條款開列於後 第一款 西藏應允遵照光緒十六年中英所立之約而行亦允認該約第一款所定哲孟雄與西藏之邊界並允按此款

建立界石 第二款 西藏允定於江孜噶大克及亞東卽行開作通商之埠以便英藏商民任便往來

貿易所有光緒十九年中國與英國訂立條約內凡關涉亞東各款亦應在江孜噶大克一律施行惟嗣後如英藏彼此允改則該三處應從改定章程辦理除在該處設立商埠外西藏應允所有現行通商之貿易一概不准有所阻滯將來如商務興旺並允斟酌另設通商之埠亦按以上所述之章程一律辦理

第三款 光緒十九年中英條約所有更改之處應另行酌辦西藏允派掌櫃之員與英國政府所派之員會議詳細酌改 第四款 西藏允定除將來立定稅則內之稅課外無論何項徵收概不得抽取

第五款 西藏應允所有自印度邊界至江孜噶大克各通道不得稍有阻礙且應隨時修理以副貿易之用並於亞東江孜噶大克及日後續設之商埠各派藏員居住英國亦派員監管各該處英國商務如欲齎送公文信函於藏官或駐藏各華官均責成商埠居住之各該藏員接收轉送復文回信亦一律責成此員妥送 第六款 因西藏違約英國派兵前往拉薩責問又因英國邊務大臣暨其隨員護兵等被侮被攻是以西藏允兌給英國政府英金五十萬鎊合盧比銀七百五十萬元以賠補兵費及無禮侮攻各情此賠款應在英政府隨時所定之處或於藏境內或於英境大吉嶺扎拉白古里等地面內清繳每年西歷正月初一日兌銀十萬盧比七十五年繳清於何處收兌英國政府預先知照第一期應在

西歷一千九百零六年正月初一日照數兌交 第七款 俟以上所述之賠款照數繳清後並第二三四五等款內所稱商埠切實開辦三年後英國政府於未辦之先仍於春丕駐兵暫守作恆至賠款清繳或商埠安立三年後最晚之日爲止 第八款 西藏允將所有自印度邊界至江孜拉薩之礮臺山寨等一律削平並將所有滯礙通道之武備全行撤去 第九款 西藏允定以下五端非英國政府先行照允不能舉辦一西藏土地無論何外國皆不准有讓與租典或別樣出脫情事二西藏一切事宜無論何外國皆不准干涉三無論何外國皆不許派員或派代理人進入藏境四無論何項鐵路電綫礦產或別項利權均不許各外國或隸各外國籍之民人享受若允此項利權則應將相抵之利權或相同之利權一律給與英國政府享受五西藏各進款或貨物或金銀錢幣等類皆不許給與各外國或籍隸各外國之民抵押撥兌 第十款 此約共繕五分由商定之員在拉薩於光緒三十年七月二十八日即西歷一千九百零四年九月初七日畫押蓋印爲憑大英國邊務大臣榮赫鵬印達賴喇嘛印此印乃噶爾丹寺長所鈐噶布倫印別蚌寺印色拉寺印噶爾丹寺印西藏首領印英藏各員現行聲明今日所立之約以英文爲憑大英國邊務大臣榮赫鵬印達賴喇嘛印此印乃噶爾丹寺長所鈐噶布倫印別蚌寺印色拉寺印噶爾丹寺印西藏首領印印度總督奄士爾簽押此約西歷一千九百零四年十一月十一日在印度新辣山印度總督

當堂批准印度政府外部大臣費禮夏簽押印底總督所聲明之款附於已經批准之光緒三十一年七月二十八日即西歷一千九百零四年九月初七日所立英藏條約之內光緒三十年七月二十八日即西歷一千九百零四年九月初七日英國所派邊務大臣榮赫鵬代英政府與噶爾丹寺長羅生愛爾會暨噶布倫並色拉別蚌噶爾丹三大寺之呼圖克圖兼與西藏民教諸首領代表西藏所立之約現經印度總督批准並惠允飭將該約第六款西藏應賠補英國入藏兵費由原定七百五十萬盧比減為二百五十萬盧比又復聲明該約所定之賠款初繳三年三期之後英國所派佔守春丕之兵可以撤退惟該約第二款所立之商埠西藏須按照第七款開妥三年並須按照該約內各節一一認真遵辦印度總督噶士爾簽押此款於西歷一千九百零四年十一月十一日由印度總督當堂簽押 印度政府外部大臣費禮夏簽押○壬寅兩○慈福端佑康頤昭豫莊誠壽恭欽獻崇熙皇太后 皇上御勅政殿法國使臣呂班親見○癸卯以張懷芝為直隸天津鎮總兵○丙午召山西布政使張紹華福建布政使周遵貴州布政使袁開第來京陛見○諭軍機大臣等有人奏浙省鐵路前經勘定城外軌綫現在創議穿城恐釀禍端請飭嚴察一摺著張曾敭確切查明妥慎辦理原摺著鈔給閱看將此諭令知之○程德全奏查郭爾羅斯後旗已經商允出放荒地於上年八月間勘丈完竣奏報在案惟該蒙幅員廣闊水陸交衝其

西南直接瀕江松花江延袤四百餘里爲上下商船必由之路沿江一帶借安臺站其中餘荒亦多而該  
蒙及臺站丁戶等素不講求農務遂墮地利於不顧近年哈爾濱開通商埠俄人輪舟往來駛行內江幾  
於反客爲主現在和議已成變時者咸謂外人必於該處開拓商埠擴張利權奴才日擘情形實屬迫不  
容緩當經咨商該蒙旗迄今未准咨覆推原其故皆緣世襲公爵現未及歲而已革署扎薩克勒蘇降扎  
普之子布彥綽克現已潛逃哈卑唆降外人而圖阻撓雖未公然要挾然已踴助殆遍噫然有先我者鞭  
之勢其現署扎薩克之協理台吉阿敏薩克尙知大義亦欲從速辦理祇以任屬代庖遇事不能自主  
深恐坐失事機謹派蒙員督省懇請將軍衙門速爲作主免致利權旁落後患不可勝言等語爲今之計  
惟有即時遴派職銜較大妥靠人員前往作速勘放庶可於事有濟茲查有裁缺署呼蘭副都統副都統  
銜花翎協領都爾蘇諾練老成熟悉務城即調回省城專辦農政先行飭赴郭爾羅斯後旗勘放沿江  
荒地飭令選擇沿江緊要處所丈放地基創設商埠並將該處餘荒一律堆放仍照定章與蒙分租設如  
該蒙有固執舊習者亦飭都爾蘇會同阿敏薩克奇曉以時勢迫切並加價均沾利益各情委婉開導想  
該蒙無不樂從若拘小節而誤大局實非奴才所敢出也合無仰懇 天恩俯念江省邊遠大局攸關請  
旨飭下理藩院轉行該蒙遵照不得稍事阻撓下所司知之○丁未 慈禧端佑康頤昭豫莊誠壽恭

欽獻崇熙皇太后 皇上御勅政殿英國使臣薩道義謁見德國署使臣葛爾士帶領提督布雷星謁見  
○己酉商部奏請改京漢滬甯鐵路大臣爲督辦並由部派員隨時稽查下政務處議奏○顧琨奏請參  
酌中西成法清釐戶口並設立鄉官下政務處議奏○庚戌以吳杰爲浙江衢州鎮總兵○壬子 上奉  
慈禧端佑康頤昭豫莊誠壽恭欽獻崇熙皇太后還宮○予故浙江海寧州學訓導錢泰吉入祀名宦  
祠○禮部奏本年二月政務處奏准覈籌舉貢生員出路其第五條章程內開二十九年管學大臣奏遞  
減科舉摺內聲明生員准比照已滿吏考職用爲佐貳雜職分發省分試用查定例貢監考職皆係令來  
京考試惟各省生員多係寒士若概令來京考試殊不足以示體恤且人數過多宜加限制擬除年輕諸  
生應挑入學堂及現充各學堂教員現入師範學堂現送出洋遊學各生外其餘生員均於考優貢之年  
准令各州縣會同教官慎加遴選保送由各督撫會同學政認真考試取其文理暢達事理明晰者大省  
取一百名中省取七十名小省取五十名其餘保送人數約計照取額十倍爲斷毋得過濫至州縣應送  
若干名由該督撫等分別酌定先期飭遵取定等次將所取各生姓名三代年貌造冊咨送等語臣等按  
照原奏覆加紬繹查辦學生員除挑入學堂及現充教員出洋遊學並緣事註劣業經出學各生不准保  
送外其餘人數多寡不同應由各督撫飭令各州縣會同教官酌量保送不得畸輕畸重以免偏枯俟後

生考舉在省舉行學政現已裁撤擬由提學使分爲兩場局門考試頭場試以經義史論各一篇取額不  
妨從寬二場試以時務策兩篇自當如額考取如有長於算學輿地財政兵政交涉鐵路礦務警章外國  
政法等事俱令於頭場前赴提學使司報明於二場試以專門題目合校兩場以定去取試卷卽照科歲  
考試酌加篇頁嚴密糊封取定後再將試卷呈送督撫核辦並造具各生姓名三代年貌清冊分送吏禮  
兩部試卷卽隨優貢卷解交吏部俾昭慎重得旨如所議行○癸丑兩○諭戶部尙書鐵良著派充督  
辦稅務大臣外務部右侍郎唐紹儀著派充會辦稅務大臣所有各海關所用華洋人員統歸節制○廷  
杰奏熱屬常年入款除支兵餉津貼緝捕局費外絕少盈餘現值振興工藝開辦巡警添設學堂政務日  
趨於殷繁經費益形其支絀是以奴才到任卽以籌款爲第一要義以整頓稅捐爲入手辦法業於本年  
正月二十日奏定刊行三聯稅票並比較功過章程一面委瀋平縣知縣俞良臣徧歷各局卡訪查情形  
現據該委員查明覆稱各局陋規如糧食正稅外則有斗用或粗糧斗五文細糧斗十文或不分粗細糧  
斗取一合五勺雜貨牲畜正稅外則有票飯多則三十文少或數文十數文此創辦之初稟准有案者今  
則一合五勺者私加至三合矣票飯本地稅給票時取之今則出進口驗票時卽婪索矣各局稅則有同  
一應稅之貨此徵而彼免彼重而此輕且有應重而反輕應輕而反重者既敢奸商繞越之端兼授胥役



侵欺之漸應否重加釐剔以免紛歧而杜弊竇等情稟請查核前來奴才伏查熱河沿理藩院舊則較之內地徵收不及十分之二三稅則太輕吏役反有所藉口以勒索規費相沿日久規費之多幾與正稅相埒而又過之今擬查照二十九年原案斗用五文十文者仍舊三合者限以一合五勺票飯原限三十文似覺籠統而欠分晰擬請以上稅十分之二為限准取一次餘均驗票放行所有各局薪工局用皆取給於斗用票飯化私為公不准動用正稅分文則稅款涓滴歸公無絲毫漏卮矣口外地瘠民貧何敢輕言加稅然奴才竊以為稅則有三品之分曰必需品曰奢侈品曰嗜好品必需品者如糧石牲畜布疋之類皆民間日用所必需名雖取之於商實則取之於民故必以惠民者惠商概予免加但刊發稅則使各局卡一律遵行不准仍前參差則官民皆有所遵守焉奢侈品如綢緞洋貨之類皆豪商富戶爭華鬬靡之需即加重徵收亦於貧民無害且以示崇儉抑奢之意嗜好品者如土藥洋酒水旱紙煙之類或無關食用或有害衛生亦應酌量加收寓禁於徵即以徵為禁以上兩項現擬稅則土藥紙煙值百抽二餘均不及百分之一核與部頒稅則尚無違踰下部知之○甲寅有奏委哈薩克流入藏境窮威難堪暫行安插住牧懇飭下新疆派員收回得旨著照所請即由錫恆聯魁有奏委速辦理○乙卯常壽大祀天於闕丘上親詣行禮○派駐義使臣黃誥赴萬國農學會○丙辰雨○以岳登龍為浙江海門鎮總

兵○賞伍廷芳修墓假三月○丁巳諭學部奏請簡放提學使司提學使一摺奉天提學使著張鶴齡補授吉林提學使著吳魯署理黑龍江提學使著張建勳補授直隸提學使著盧靖署理江甯提學使著陳伯陶署理江蘇提學使著周樹模署理安徽提學使著沈曾植署理山東提學使著連甲補授山西提學使著宗室錫嘏補授河南提學使著孔祥霖署理陝西提學使著劉廷琛署理甘肅提學使著陳曾祐署理新疆提學使著杜彤署理福建提學使著姚文棟補授浙江提學使著支恆榮補授江西提學使著汪貽善署理湖北提學使著黃紹箕補授湖南提學使著吳慶坻署理四川提學使著方旭署理廣東提學使著于式枚補授廣西提學使著李翰芬署理雲南提學使著葉爾愷署理貴州提學使著陳榮昌署理所有編檢御史署理者均著開缺以道員用餘著照所議辦理○學部奏臣部奉旨設立為全國學務總綱之區國民程度之淺深教育推行之遲速釐率督催責任綦重願設官分職必豫籌夫久遠可行之規以徐收夫名實相副之效臣等公同商酌仰體朝廷設官敷教之精心參仿外商學部分曹隸事之辦法擬設左右丞各一員左右參議各一員參事官四員分設五司十二科郎中員外郎主事各缺視事之繁簡為缺之多寡期於各專責成無有曠誤此外視學官暫無定員諮議官不設額缺其一切編譯圖書調查學制以及督理京師學務與夫本部會議研究教育之事皆分設局所派員兼理徐規美備至國

子監業經遵旨歸併查該衙門舊日職掌係專司國學及典守奉祀之事現學務事宜已經歸併辦理其文廟辟雍殿兩處典禮崇隆觀聽所傾自應特設專官以昭慎重擬設國子丞一人總司一切禮儀事務分守典守奉祀等官各司其事仍隸臣部辦理俾垂久遠得旨如所議行○戊午以袁大化爲山東按察使○己未商部奏自比年以來各省官紳耳目所習智慮所周咸知借款造路不免損失利權於是協力同心先後爭籌自辦現在各省所定之路綫往往省界分明各存畛域而揆之枝幹之若何維繫軌道之若何貫通則各省官紳類未能統規全局通盤籌畫約計粵漢洛潼陝甘等綫大概尙合辦法他若贛皖閩浙等省類皆路綫交錯各自爲謀論目前開通風氣起見各辦各路原似無妨惟通國之有鐵路一如大陸之有江河源遠則流長枝多則幹盛下流以上流爲來脈上流以下流爲尾閭互相灌輸乃足以宏翕受若枝節爲之將通國鐵路告成之日勢必有參互複沓駢枝拇指之虞於日後修養之需亦恐難操勝算臣部綜持路政自應先事圖維通籌熟計大凡地方衝要商旅輻輳物產繁多之區此乃路綫之最要者地方稍僻生貨較蕃開通利便之區此乃路綫之次要者其地瘠民貧出產無多商賈轉輸運銷狹隘之區此則路綫之可以緩辦者應由各省疆臣先行選派熟悉工程測繪之員各就本省分別何地爲最要次要之路綫何地可以緩辦之路綫何綫爲幹何綫爲枝已造之路續其實綫未造之路

列爲虛綫詳晰咨送臣部參酌釐訂集成各直省路綫全國嗣後各省官紳請辦鐵路應就臣部所繪全國分別緩急指明段落集資認辦庶幾次第建築枝幹相維脈絡相貫他日全國路成無虛糜之工程有周行之利賴伏查上年十月臣等以各省鐵路應行釐正軌道奏奉 諭旨允准通飭各該管鐵路大臣遵照辦理在案茲查路綫一項其關繫路政重要之處實與軌道相爲表裏應請 飭下各直省將軍督撫暨各鐵路大臣一體迅飭所屬認真勘測定期報部用佐要政得 旨如所議行○學部禮部奏恭照光緒三十一年八月奉 上諭前已有旨停止科舉及歲科考試飭令各省學政專司考校學堂事務嗣後各該學政事宜著卽歸學務大臣考核毋庸再隸禮部以昭劃一欽此臣等伏查從前之恩拔歲優貢及廩增附生均由學政考取册報禮部其貢士舉人副貢親供卷册亦隸禮部所有各省貢士舉貢生監改籍更名出繼歸宗以及承廕就職斥革開復各項事宜向歸禮部承辦此次欽奉 上諭學政專司考校學堂事務毋庸再隸禮部恭摺 諭旨之意似專指學堂而言其從前之考試等事應隸何部未奉明文現在停止科舉推廣學堂學部新設籌畫一切章程頭緒紛繁又經政務處及袁世凱等奏准寬籌舉貢生員出路將來保送舉貢及各省優拔貢等項考試事體亦極煩重各省因章程未定文電交馳紛紛請示率皆分咨學禮兩部若不劃定界限竊慮承辦各員無所適從公事轉多貽誤且册檔文卷均在禮

部往返咨查既延時日若全移交學部新舊紛歧尤多不便臣等公同會商擬請將從前之貢士舉人恩拔副歲優貢並廩增附生例照監生考試引 見解卷行文以及改籍更名就職報捐一應事宜統由禮部仍照例章分別核辦至由學堂出身之進士舉人優拔副歲貢廩增附生暨出洋遊學畢業生並國子監歸併學部後在學部領照之監生考試引 見解卷行文以及改籍更名就職報捐一應事宜統由學部查照新章分別核辦如此劃定界限庶承辦者有所遵循而事情亦不致歧誤矣得 旨如所議行○庚申調劉光才爲江南提督以徐印川爲貴州提督陳萬清爲貴州古州鎮總兵○辛酉 上奉 慈禧端佑康頤昭豫莊誠壽恭欽獻崇熙皇太后幸頤和園駐蹕○乙丑顧燏奏請各省廣設工藝廠自造機器下商部議奏○吳郁生奏滬甯鐵路由英國銀公司要求承造經前工部侍郎盛宣懷與之訂立合同以長不逾六百中里之路工而預備借款至三百五十萬磅之鉅估價過多必致浮濫自合同宣布後連近駭然上年蘇省同鄉京官迭次陳奏以核減路本並責令盛宣懷截止一百二十五萬磅小票爲請欽奉 嚴旨改派唐紹儀妥籌辦理仰見 朝廷眷顧東南慎重路政之至意唐紹儀向稱廉幹宜如何督飭在工員司嚴杜虛糜以副 恩命近聞滬甯工程司來京又以工款不敷有商議續售小票七十萬磅之說此項路工卽就業經借定之二百五十萬磅儘數開支每一中里約合銀三萬兩以上視他路成本

浮逾兩倍公家受賜已多今若徇工程司之請再借鉅款是唐紹儀接辦以來於盛宣懷失算之處並無補救之方難逃 聖明洞鑒 愚以爲借款造路既經訂有合同果能按照合同所載切實辦理亦尙可稍資鈔束查合同第四款內開在英國用出各帳以及匯交中國工程所用各帳均應按三箇月爲一次呈繳總管理覆核稟明督辦大臣擬准簽字方能作准並轉咨外務部戶部統轄鐵路礦務總局存案等語今因甯路工尙未及半而二百五十萬磅之借款已將告罄究竟自興工以後曾否將一切用款按三箇月開報一次核准有案局外毫無聞知而督辦大臣有稽核之權商部統轄路事亦有考查之責皆不應置之不問此鉤勒已借支出之款可以按照合同辦理者一也又查合同第五款內開其第二次以及下餘各次小票於未發售之先銀公司須預先知照中國出使駐英大臣俾中國 國家遇有款項可以撥交總公司歸入鐵路帳內與售小票之借款一律支用如中國 國家果有撥款則三百二十五萬磅之數卽照撥款若干扣減等語今甯寧路工如果鉤勒以後明知從前虛糜之款無可挽回而估計全路告成爲止實係不敷若干而應自行籌撥萬不可再令銀公司出售小票致以九扣虛數受人盤剝此自籌待用不敷之款可以按照合同辦理者二也至款之從何籌撥 尤有說從前蘆漢鐵路開辦之初由戶部撥借官款銀九百餘萬兩除淞滬萍醴兩路挪用外計蘆保一段工費五百六十餘萬兩全係動用

官款現歸京漢一路統轄應請 飭下商部戶部就京漢行車餘利項下指撥銀二百萬兩卽於應交官款息銀內分年攤批又萍醴鐵路盛宣懷爲萍鄉運煤之用私挪蘆漢官款修造上年滬甯動工時於銀公司借款內提撥一百萬兩作爲歸還淞滬造路之工價卽以此款一併挪用於萍醴約計亦當在二百萬兩內外夫萍鄉煤礦本係商辦近來煤價增昂以運費供養路之用必有盈餘若此路併歸商辦最爲名正言順應責成商部戶部於一年之內將萍醴招商接辦卽以官款撥歸滬甯不得遲延貽誤是滬甯既得四百萬兩公款接濟一面仍由唐紹儀督飭總管理處撙節動支以昭核實藉酌盈劑虛之計爲補偏救弊之謀較之續借公司磅款既有九折又有磅價上下匯兌往來種種虧耗利權外溢相去奚啻天壤微臣籍隸江蘇深維路事關係重大合無仰懇 天恩飭下部臣通盤籌畫奏明辦理下商部戶部知之

閏四月己巳商部奏整理商業必以銀行爲基礎銀行者所以彙聚資本酌盈劑虛握商界交通之機關銀行日益衆多商業日益發達國勢卽日益強盛東西各國除中央銀行主持行用國幣外商業銀行林立於國中視國政者恆以銀行之多寡準國勢之強弱中國商務渙散母財缺乏以致興辦農工路礦各項實業每苦集款爲難上年戶部奏辦銀行以整齊幣制爲宗旨實具中央銀行之規模而商業銀行自

候補五品京堂林爾嘉首先承辦經臣部奏准又臣部三等顧問官候選道周廷弼創設信成銀行兼辦儲蓄經臣部批准各在案其餘各省紳商之繼起者尙未有人而英之匯豐俄之道勝德之德華比之華比日本之正金美之花旗各銀行早已遍布於都市非自行廣設商業銀行不足以挽回利權競立於商戰之場臣部綜轄商政深維商業銀行實爲振興商務之根本而應從速籌辦藉資模範擬由臣部籌撥官款并招集商款合銀一千萬元作爲股本收足三分之一先行開辦設總行於京師設分行於奉天上海香港新嘉坡等處樹之風聲俾商人有所取法以後漸次推行則商界懋遷自必益臻便捷且與戶部銀行權限既極分明機軸尤資聯絡舉凡綜核度支釐整幣制交納公款諸大端爲戶部銀行之專責而臣部所辦者則以提倡商務籌集資本以振興農工路礦各項實業爲主義臣職振曾與戶部尙書鐵良詳細面商爰知臣部設立銀行實與戶部銀行有交相爲助之益彼此辦事界限雖各有不同而其中要自有密切之關繫交通既便利益日宏實於中國財政深有裨益至此項商業模範銀行關繫商務命脈必須操守廉潔才望素孚之員方足以資經理查有臣部右丞王清穆右參議熙彥均於財政講求有素擬請派充該銀行總理如蒙俞允應卽責成該丞參擬訂章程參酌東西各國商業銀行規制認真籌辦仍由臣等將一切應辦事宜隨時請旨遵行下財政處戶部議奏○商部奏臣部於光緒三十二



年四月間接據江蘇通省京官暨在籍紳士日請起居注官翰林院侍讀學士惲毓鼎等二百五十六人  
公同呈稱竊維近年風氣漸開鐵路關繫之重盡人皆知若皖贛川粵閩浙等省類皆由全省紳商合力  
籌辦均邀奏奉 諭旨允准在案江蘇處江海要衝爲東南綽綽之區現在滬甯業已借款開造此外幹  
枝各綫大概自江以南由上海經松江以達於浙自江以北由海州經徐州以達於豫冀輪銜接應應首  
先籌築以捫利權其餘各綫亦宜陸續測勘次第開築現經在籍紳商屢次集議擬先集股款一千萬元  
設立蘇省鐵路有限公司由創辦諸人先行認定百餘萬元以爲勘路興工之用路未告成以前之股息  
擬就地方情形酌量另行籌補惟造端宏大風聲所樹首在得人非資深望重爲全省紳商所信任者不  
足以膺茲鉅任查有商部右丞王清穆學識宏通思慮周密擬公舉爲鐵路總理商部頭等顧問官翰林  
院修撰張謇才具恢宏辦事練達擬公舉爲協理以之主持公司一應事宜必能措置裕如爲蘇省力謀  
公益毓鼎等或服官京師或散處鄉里往復電商意見相同除將勘路集款招股興工各詳細事宜公同  
妥訂章程再行呈請核奪外謹將設立蘇省鐵路公司公舉總協理繕具大概辦法公懇據情奏明立案  
請 旨遵行又准工部尚書陸潤庠都察院左都御史兼署禮部尚書陸寶忠內閣學士兼禮部侍郎銜  
吳郁生宗人府丞陳名侃外務部左丞鄒嘉來署外務部右丞雷補同等函同前因並稱江蘇鐵路亟

宜籌築潤庠等事關桑梓允宜力贊其成王清穆張謇熟諳時政鄉望素孚令其規畫路務必可觀公懇准如所請各等語臣等伏查蘇省物產富饒地勢利便外環大海中互長江與山東河南安徽浙江各界毗連商賈往來極形繁盛實爲東南衝要之區現在諸政日見發達所有安徽浙江兩省鐵路業由該省紳士先後自籌建築呈由臣部奏奉諭旨允准在案今江蘇紳士惲毓鼎等呈請援案辦理將來與安徽浙江等省接軌合轍以冀商運便捷力保利權洵爲扼要之圖其公舉臣部右丞王清穆翰林院修撰張謇辦理鐵路事宜查右丞王清穆才大心細規模宏遠夙在臣部辦事動中窺要上年奉命考察商務暨會查路款項周歷沿江沿海各埠於鐵路各項辦法均曾研究茲雖在京供職而函電商推適爲控制於路務自有裨益既經該省紳商等合詞公舉前來可否仰懇天恩俯念路政重要准將臣部右丞王清穆派令總理江蘇鐵路以順輿情修撰張謇才具開展辦事結實向能整理實業究心商務於鐵路事宜亦所熟悉既爲鄉里所推應請派爲協理所有招股勘路購地興工各要端均應由該紳等妥慎籌畫隨時稟呈臣部詳核奏明切實興辦以一事權而聯衆志至該省路綫除滬甯業已借款建築欽派大臣辦理外該紳等所稱自江以南由上海經松江以達於浙自江以北由海州經徐州以達於豫首先籌築以收貫輸銜接之利意在使內地土貨灌輸商埠爲利便運途收回利權起見籌畫至爲允當

應准先予立案俟股本集有成數卽由臣部飭令趕速興工一切遵照臣部奏定章程辦理得旨如所  
議行○庚午吏部等奏內閣鈔出開缺廣西巡撫李經羲奏籌辦四十八崗善後請將桂林同知改爲中  
渡撫民同知並劃撥地段駐兵防守以專責成而資控制一摺光緒三十二年二月初一日奉硃批該  
部議奏欽此欽遵鈔出到部臣等查該撫前請將慶遠理苗同知移駐五十二崗攔內業經聲明四十八  
崗事同一律應以桂林同知移駐中渡容另案奏請在案此次奏稱四十八崗地方隸桂柳兩府之交與  
永寧永福融縣柳城雒容等州縣在在毗連天生險僻最易藏奸其中居民疇嘗向無成聚剽竊匪來無  
以自庇往往被其脅從竄爲桂省心腹之患調任撫臣柯逢時督剿崗匪會奏准將桂林同知移駐該崗  
未經擇定地方適有柳州之變幸而事機順手崗地一律肅清其善後各事如搜內崗給牛種開礦廠設  
學堂以及編查團甲各節亦經次第籌辦自應遵照奏准成案以桂林同知移駐查雒容縣屬中渡地方  
附近該崗既爲桂柳關鎖亦扼全崗咽喉應請將同知移駐該處卽改爲中渡撫民同知以符名義其所  
轄地方由中渡東至永福縣屬之潯墟凡十二里南至雒容縣屬之長盛坳凡三十里西至柳城縣屬之  
茶嶺凡五十里北至永寧縣屬之高坡凡四十里東北至永寧州屬之寨上凡四十里東南至雒容縣屬之  
瓦廠凡十五里西南至柳城縣屬之水研凡五十里西北至融縣之斗耀凡七十五里依鳥道算東西緯

縱五十五里附北經縱六十五里八至周環計面積二千七百九十零方里四十八畝均在界內等因實係爲因地制宜起見自應准其將桂林同知移駐中渡專理民事劃撥管轄地段定爲中渡撫民同知以符名義而資控制至所稱界內錢糧獄訟緝捕等事均歸管理刑名案件仍歸桂林府審轉倉庫錢糧亦歸該府考核一切處分悉照專管官查辦定爲繁難題調要缺初次揀補但期人地相宜不拘丞闕州縣酌量揀補一次以後升補兼行並添設照磨兼司獄一員以資佐理其駐防中渡原隸雒容縣之平樂司巡檢應請移駐崗內之平山城更名爲平山司巡檢改爲中渡同知管轄所有巡檢照磨兩缺請卽作爲咨調要缺均與同知三年俸滿在任候升各節吏部查該同知既定爲撫民專官其所請管理事件審轉考核及添設移駐改隸佐理各員並酌定各缺請補事宜均應照准以專責成而收治效又所稱該處設官之初承大亂之後必須酌駐防營亦經勘度崗內外扼要地方築營一十五座並於中渡建築礮臺一座以相犄角卽以保安中前中後左前左後四營分別駐紮巡防該四營均係挑選各該處精壯團丁編伍入營取其地熟悉利害最切以之搜巡防衛較爲得力並飭訂會哨巡緝章程隨時認真督飭防捕以杜匪徒生心俟營後一律竣事再就現設練兵酌定經制守崗兵額一節兵部查該崗地方險僻最易藏奸必須酌定防營以資搜剿其設立營座建築礮臺並飭訂會哨巡緝章程自爲扼要之圖至守崗經

制額兵俟替後事竣酌定成數後再行咨部立案以備查核又所稱該處既有礮臺營防足資防守城垣暫從緩議其應有衙署及倉庫監獄各項均經酌撥銀兩分別建造壇廟祠宇亦飭就該處舊有寺廟暫行酌改凡建造酌改費用均令核實造報歸入前後軍需案內作正報銷一節工部查該處城垣原奏內稱既有礮臺營防足以防守不妨暫從緩議至建造衙署倉庫監獄各項並酌定壇廟祠宇等工均應准如所議由該撫酌量形勢轉飭該同知核實分別修造工竣造冊報銷又所稱桂林同知原支養廉役食爲數無多今改爲中渡撫民同知事務較繁應請援案酌增養廉役食並支給祀典銀兩其添設之照磨兼司獄一員應支廉俸亦請援案支給巡檢廉俸一仍其舊已飭司造冊送部核定並請 敕部分別鑄造關防印記頒發啟用以昭信守科舉既已停止自毋庸議設學官亦毋庸議撥學額各節戶部查該撫咨送清冊所列同知薪俸及巡檢俸廉役食各銀兩均係未缺原支之數自應照准同知擬給每年養廉銀一千兩照章停支一成實支銀九百兩照磨兼司獄每年養廉銀八十兩俸薪銀三十一兩五錢二分同知照磨隸役七十六名每年工食銀六兩四年六兩五錢及春秋祭品各銀數核與本年三月奏准安化同知成案相符應一併准其支給各員養廉由司庫給領俸工祭品在於該同知徵收錢糧項下助支所有臨桂離容二縣原支桂林同知及平樂鎮巡檢俸工銀兩應卽照數刪除編入司庫存留項下

徵解造報禮部查該撫奏請將桂林同知移駐雒容縣屬中渡地方改爲中渡撫民同知並添設照磨兼司獄一員其駐防中渡原隸雒容縣之平樂司巡檢移駐箇內之平山墟更名爲平山司巡檢改隸中渡同知管轄既經吏部核議准其改設自應另行鑄給桂林府中渡撫民同知之關防中渡照磨兼司獄事印中渡屬平山司巡檢之印以昭信守恭候 命下由吏部撰擬各字樣送部以憑鑄造又所稱該同知管轄地段係由五州縣劃撥而來戶口地畝錢糧數目均極畸零繁冗一時未克清釐飭該同知及該各州縣限三箇月內查勘明確續行奏咨一節戶部查該同知所轄地段原奏已聲明四至八到應卽速飭勘明劃撥俟奏咨到日再核並將編開甲給牛種次第舉辦情形及開礦廠設學堂如何就地籌款之處一併咨部查核得 旨如所議行○辛未兩○財政處奏光緒三十二年三月二十四日准軍機處鈔交雲貴總督丁振鐸奏議設滇局鑄造銀銅元以挽利權而裨路政一摺奉 硃批財政處戶部議奏欽此欽遵傳知前來查該督前以開辦滇緬鐵路奏請鼓鑄銅元仍兼鑄銀幣經臣等議覆銀幣一項奏明專由總廠鑄造仍留南北洋鄂粵四局其餘並應停罷惟滇省地處邊遠轉運實難國家銀行未能偏立將來鐵路所需若聽其行使洋元亦殊非計計 飭下雲貴總督查照新章體察情形應否於南北洋粵鄂四局外添設一局奏明辦理至該省官鑄銅元自可勻撥餘利以爲造路之用無庸令公司鼓鑄各等

因奏准行知遵照在案茲據該督奏稱藩庫邊微去南北洋粵鄂均達英法洋元充斥已久非自鑄造則利權盡失現在既定新章自應遵照辦理應請添設雲南造幣分廠遴員責成總辦無庸由鐵路公司經理各等語臣等伏查該督前請鑄造銀元係爲抵制洋元之充斥並欲以餘利添資鐵路股本當以奏定新章鑄造銀幣分兩成色與從前各省所鑄舊式銀元迥不相同該督以餘利爲言似尙未接到新定章程是以奏令體察聲復茲據奏稱請設雲南造幣分廠一切遵照新章辦理臣等公同商酌滇居邊遠與他省情形不同且鐵路需用孔殷洋元久虞充斥所請添設分廠遵章添鑄銀幣之處自應准其暫行辦理俟一二年後約計所鑄銀幣足敷鐵路流通行使或戶部銀行推廣設立在該省附近有分行堪供周轉隨寄應卽停鑄以符定章如蒙 俞允當由臣等行知該省遵照辦理並飭造幣總廠刊發祖模由該省頒領開鑄其成色分兩務令遵照奏章不得稍有參差至該省所鑄銅幣亦應遵章限制鑄發不得專恃餘利以充鐵路股本致礙國法得 旨如所議行○甲戌刑部都察院奏光緒三十二年四月初二日軍機處交出本日法律大臣沈家本等奏現行律內虛擬死罪分別改爲流徒一摺奉 旨著刑部都察院議奏欽此並鈔錄原奏知照前來臣等查閱該大臣等原奏內稱竊臣等奉 命修訂律例參酌各國刑法以冀收回治外法權是以上年三月間奏准刪除凌遲場示諸重刑並聲明尋常應入秋審各犯將

來應否變通再行妥議等因計自新章頒布已屆一年各直省尙推行無阻臣等復詳加考核查有現行律例內其虛擬死罪而秋審列緩者莫如戲殺誤殺擅殺三項戲殺初無害人之意死出意外情節最輕誤殺雖有害人之心而死非互鬪之人亦初意所不及擅殺情節輕重不等第死者究係有罪之人故此數項罪犯在各國僅處懲役禁錮之刑考之唐律戲殺誤殺各按其當場情形分別徒流並無死罪擅殺分勿論及徒流絞四等亦不概問死罪中國現行律例不分戲誤擅殺皆照鬪殺擬絞監候秋審緩決一次卽准改流其重者緩決三次改流蓋雖名爲絞罪實與流罪無殊不過虛擬死罪之名多費秋審一番文牘而已現當綜核名實併省繁重之際與其空擬以絞徒事虛文何如徑改爲流俾歸簡易擬請嗣後戲殺改爲徒罪因鬪誤殺旁人並擅殺各項罪人現律應擬絞候者一律改爲流罪均按照新章毋庸發配歸入習藝所罰令作工其現行例內如誤殺其人之父母兄弟等項並擅殺二命以上及謀故火器擅殺各項不准一次改等者酌加二年如遇情有可原或情節較重者應俟臨時酌量辦理其戲傷誤傷擅殺並例罪不至死者均於本罪上遞減一等以免窒礙似此變通量減不過去其虛擬死罪之名仍於生死無關出入等因遵奉 諭旨交臣等議奏仰見 聖明睿照於變通法典之中仍寓矜慎刑章之意欽佩莫名臣等查律載因戲而殺傷人因鬪而誤殺傷旁人者各以鬪傷論註云死者並絞傷者驗輕重坐



罪又罪人已就拘執及不拒捕而擅殺之或折傷者各以鬪殺傷論又例載戲殺誤殺間擬絞候應入緩決之犯 朝審一次之後刑部查核奏明將戲殺誤殺之犯改爲杖一百流三千里其誤殺案內所殺係其人之祖父母父母伯叔父母妻兄弟子孫在室女者俱係查辦緩決時再行照例辦理又擅殺間擬絞候入於秋審緩決辦理之犯除謀故火器殺人或連斃兩命及各斃各命致斃人數在四名以上者均不准一次減等外其餘俱於緩決一次後卽予減等發落各等語推原例意戲誤擅三項絞候人犯雖核辦秋審時同一例應緩決而准減不准減則視情節之輕重以爲衡蓋有以宏矜恤之惠斯不能不防殛殺之端例內界畀秩然至爲精當茲據該大臣等請將戲殺改爲徒罪因鬪誤殺旁人並擅殺各項罪人現律應擬絞候者一律改爲流罪等因臣等遂加查核戲殺一項唐律減鬪殺二等罪止滿徒今律雖照鬪殺擬絞秋審向不議實亦無緩決一次不准減等明文誠以此等人犯用刀相戲本無害心不期而適戕其人之生情與過失相近律於過失殺人准鬪殺罪收贖追銀後便無餘罪則戲殺似不當過嚴若因鬪誤殺旁人雖衅起鬪毆已有害人之心而死非互鬪之人實出於鬪者意外核與同謀共毆致被糾之人毆死非其所欲謀毆之人情事正復相等查同謀共毆如被糾之人毆殺非其所欲謀毆之人例於起意糾毆之犯得照原謀改徒卽被糾死之人毆其所欲謀毆之人而起意糾毆之犯亦止照律滿流以情言

則謀重而誤輕以法言則謀輕而誤重比例參觀似因闕誤殺旁人一項亦當詳核案情量從輕典至擅殺姦盜各項罪人殺之者或激於一時之義忿或出於臨事之追蹙此等應入秋審之犯較之戲誤兩項人數稍多若查其事非得已情有可原者倘係合於緩決一次卽予減等之例似應一併略迹原心與戲殺誤殺各罪均無庸虛擬死罪用彰 聖世寬仁之治也等參考例章公同商酌擬請嗣後戲殺誤殺擅殺三項人犯凡秋審例准緩決一次卽予減等者應准如該大臣等所奏戲殺改爲杖一百徒三年因誤殺旁人並擅殺各項罪人現行律例應擬絞候者一律改爲杖一百流三千里均按照新章免其決杖毋庸發配歸入習藝所罰令工作將來遇有此三項人犯案件卽由各該省專咨報部仍由刑部核議按季彙奏一次俾昭鄭重如有情節不符避重就輕者各以官司故出人罪論其現行例內誤殺其人之父母兄弟等項並擅殺二命以上及謀放火器擅殺各項凡秋審不准一次減等者情節較重若遽將此項人犯亦復徑行改爲流罪實不足以示懲儆應請仍照向例辦理該大臣等議將誤殺擅殺情重人犯一律徑改爲流酌加工作二年之處應毋庸議至戮傷誤傷並擅殺例不至死者核其情罪尤可矜原應均如該大臣等所奏各於本罪上遞減一等以免窒礙而示區別再擅殺案內餘人及擅傷別項罪人均有應科罪名原奏未曾議及亦應於本罪上遞減一等庶免參差如此量爲分別庶新法逐漸變通舊制無

虞偏重如蒙 俞允卽由刑部將本年秋審冊內處殺三項人犯例准緩決一次減等者一律扣除先行開單奏請改照新章辦理並通行各直省督撫都統將軍等一體遵照得 旨如所議行○乙亥子故記名提督前江南徐州鎮總兵陳鳳樓記名總兵江南淞北營副將劉長春記名提督江南揚州營參將袁大升優卹戰功事蹟交國史館立傳○丙子 上詣建福宮行禮○賞王文韶續假一月○己卯商部奏山西紳商擬集股本設立同蒲鐵路公司上年七月間經山西撫臣張曾敭奏請 飭部立案奉 硃批該部知道欽此欽遵到部當經咨行該撫臣將籌款購地各詳細章程轉飭該省紳商切實妥議報部查核去後茲據山西京官翰林院庶吉士解榮輅等聯名三十三人呈稱同蒲鐵路築款修築造端不易非公舉一人總司其事未易綱舉目張更非鄉望素孚之正紳尤不足以昭衆信職等迭次籌商查有在籍前甘肅布政使何福堃廉明公正規畫精詳堪勝總辦之任擬援贛閩等省成案公舉爲總辦一切用人集股購地各事宜統山該總辦詳訂妥章稟明山西撫臣轉咨商部察核辦理至路線原請先築太原至平遙一段究竟於商務能否起色尙難懸揣應併由該總辦察度情形稟報核辦呈懇俯准奏咨立案等情臣等查山西路線上通秦隴下接汴洛爲西北道路中樞扼要之區該省紳商果能自籌建築裨益商務殊非淺鮮自應照准立案其公舉在籍前甘肅布政使何福堃總辦同蒲鐵路事宜既據

該省京官具呈公舉是必鄉望素孚合無仰懇 天恩俯如所請派令總辦同辦鐵路以順輿情所有用人集股購地定綫各要端均責成該總辦何福楨會同地方官紳詳細妥籌報部核辦以重路政得 旨如所議行○商部戶部奏 臣部於光緒三十二年四月二十八日准軍機處片交內閣學士兼禮部侍郎銜吳郁生奏滬甯鐵路用款過鉅請飭另籌接濟以免續借受虧一摺奉 旨商部戶部議奏欽此欽遵到部查原奏內稱滬甯鐵路有續售小票七十萬磅之說此項路工卽就業經借之二百五十萬磅儘數開支每一中里約合銀三萬兩以上視他路成本浮逾兩倍公家受虧已多今若再借鉅款是唐紹儀并無補救之方查合同第四款內開所用各帳應按三箇月一次呈核轉咨在案第五款內開中國國家遇有款項可以撥交總公司歸入總帳與小票借款一律支用各等語是鈎勒已借支出之款自籌待用不敷之款均可按照合同辦理請將京漢行車餘利項下指撥銀二百萬兩并將津滬招商接辦卽以盛宣懷私挪之官款約二百萬兩以外撥歸滬甯接濟一面仍由唐紹儀督飭總管理處撙節動支以昭核實等因商部查此案先於本年四月二十五日准辦理滬甯鐵路大臣唐紹儀兩稱鐵路添售小票一事銀公司代表濮蘭德總工程師格林森於四月初旬來京連日磋商據京次開來清單實不敷英金六十七萬磅有奇內除去購地款十萬磅由江蘇紳民代籌或另行自籌外實不敷五十七萬磅有奇除去加增

回恩實約五十五萬磅請核定示覆等因臣部正在核辦間適准軍機處片交吳郁生奏稱前因并續據唐紹儀致臣部函稱此事迭據銀公司代表濮蘭德再三爭辯曉曉不已業經曲爲解喻杜絕其冀幸之私現在續借款一節銀公司業已緘默并稱現在存款數目倫敦存款截至本年西二月底存英金六十五萬餘磅存上海通商匯豐兩銀行暨各錢莊銀二百八十餘萬兩各等語臣等伏查滙甯鐵路總債重權利不免外溢業經臣部於上年十月間詳晰奏明在案目下添售小票一節雖據唐紹儀函稱銀公司業已緘默而存款之數日後是否敷用一時殊難懸揣惟按照原訂合同所載在英國用出各帳以及匯交中國工程所用各帳均應三箇月一次呈繳總管理處覆核稟明督辦大臣覆准簽字方能作准并轉咨外務部戶部統轄鐵路礦務總局存案各等語原以藉資鈐束收內外相維之益業經臣部於上年三四月間將滙甯借款過鉅之故發電咨詢盛宣懷既從未具報唐紹儀接辦以來亦尚未及核准帳冊咨報到部現在路工已築若干行車收款積存若干計全路告成是否實有不敷臣部既均無卷冊可查礙難懸斷應請飭下辦理滙甯鐵路大臣唐紹儀詳晰聲明此路公家受虧太鉅究竟補救之方從何入手現存各款能否設法節省就此鉤勒不再續借通盤籌畫自行奏明請旨辦理臣部綜理路政全賴管路大臣將工料等差款項出入切實報告俾得隨事稽核以收互相維繫之效若所報未能詳盡臣

部欲施整理之方亦苦無從著手應請飭下唐紹儀查照臣部歷次奏咨案件隨時具報至所用款項應先報明臣部核准立案方准開支其唐紹儀接收以前盛宣懷經手開支各款實有攸歸亦應由盛宣懷趕速詳細報部以重工款至萍醴鐵路前山盛宣懷於京漢官款內支撥建造業由臣等以盛宣懷事前并未奏明立案礙難核銷等因於上年九月間奏明在案此路係動用官款修築應再由臣部行催盛宣懷將一切款目案由詳晰具覆再行奏明核辦原奏所稱招商接辦撥歸官款一節應毋庸議又原奏所稱指撥京漢行車餘利二百萬兩卽於應交官款息銀內分年攤扣一節戶部查京漢行車餘利應繳官款息銀前因臣部籌款艱難咨行督辦鐵路大臣唐紹儀商訂交息辦法以爲將來撥用之需且滙寧路款既據唐紹儀二次函稱倫敦尙存英金六十五萬鎊上海各銀行錢莊尙存銀二百八十餘萬兩是存款尙鉅不惟不應再借洋款更可無須動撥官項所請指撥京漢行車餘利礙難照准理合恭摺具陳得旨如所議行○庚辰吏部奏查政務處會同臣部議覆給事中熙麟奏請復詹事府一摺內開擬請翰林院補設六品官滿漢各一員定名爲翰林院撰文漢缺開列比照中允等因奉旨允准在案又查品級考中允開列具題由國子監司業論倖升任無人方以翰林院修撰編修檢討論倖升任又查翰詹開坊引見例載國子監司業缺出翰林院將倖滿修撰編修檢討開列二十員咨送吏部核其倖次帶領

引見補授各等語今國子監司業員缺裁撤則撰文爲翰林升任初階應否照開坊例引見補授之處恭  
候 欽定得 旨如所議行○辛巳諭政務處奏開辦考查政治節請派員充當提調一摺內閣學士兼  
禮部侍郎銜寶熙江蘇常鎮通海道劉若曾著開缺以三品京堂候補均著充考查政治館提調仍責成  
該王大臣等督飭各員將中外政治悉心考核詳加纂輯用備甄採餘依議○戶部奏查臣部則例內載  
出入錢糧法馬由部定式由工部鑄造等語凡各處請頒法馬向由臣部知照工部按式鑄就咨送臣部  
並派員會同臣部司員及請領委員當面較對用昭慎重惟各員會同較對爲時無多且銅質間有純駁  
未必盡能無差相沿已久難免有畸輕畸重之誤臣部職司出納必以整頓權衡爲要且推廣銀行以及  
土藥統稅總局造幣總廠等處均須有畫一法馬以便行用倘稍有多差卽貽人口實臣等公同商酌擬  
變通辦理卽於臣部司員中簡派留心此事者按照釐法親自監造細加較對不拘時日總以大小輕重  
皆準爲度並一時多造數副備用兼備考較易爲畫一以求合古者同衡謹權之意經此次較定之後他  
處有請頒法馬者仍由臣部知照工部按照此式鑄造以符定制並飭令較對之員認真細較如有不合  
式者卽駁還另造不得含糊了事貽誤將來得 旨如所議行○壬午遣世鐸詣 覺生寺溥偉詣 大  
高殿恭代祈雨○乙酉賞峻昌副都統銜作爲伊犁察哈爾領隊大臣○丙戌以喬樹枏爲學部左丞李

家駒爲學部右丞孟慶棠爲學部左參議徐坊爲學部右參議徐坊爲學部國子丞○諭本日御史顧  
璣奏岑春煊受病已深代爲籲恩飭令開缺等語朝廷用人自有權衡該御史率行瀆請殊屬冒昧顧璣  
著回原衙門行走○諭朕欽奉 慈禧端佑康頤昭豫莊誠壽恭欽獻崇熙皇太后懿旨近來時局艱難  
民生困苦深宮宵旰焦勞無時不以敬天勸民爲念比因賠款浩繁加以舉辦要政各省籌捐集款重累  
我民實皆萬不得已之舉愴懷民瘼早切疚心本年湖南江西等省被水成災饑黎嗷嗷待哺近畿一帶  
又復缺雨麥收多歉糧價驟貴民食維艱每念陽雨愆時偏災屢告政事闕失或有未知循省之餘益深  
恐懼我君臣上下惟當交相咨儆痛戒因循實事實心修明政治卽各省籌集各款當思民膏民脂來處  
不易務宜撙節休養留其有餘地方所行新政如練兵興學巡警工藝諸要務原爲教養保衛而設自不  
可視爲緩圖但必以百姓之財皆爲百姓之用不得漫無稽核濫費虛糜濱海沿江鹽鹵會匪時有滋動  
擾害閭閻大爲斯民之害務當隨時嚴查重懲以安良善並著責成該將軍督撫勸官方整飭吏治體  
念時艱共培元氣庶感召天和用副朝廷不忘修省之至意○諭周馥奏查覆廣東勒捐滋事一摺鐵路  
爲國家要政粵漢鐵路收回自辦商民籌款興築官爲維持保護辦法甚爲妥善全在該省官吏紳商同  
心協力聯絡一氣以成全功不得各持意見致妨公益茲據傳粵中紳民捐助認股已約計二千萬足見



德公好義路事可則有成卽著岑春煊秉公籌度會集紳商妥舉總理行員奏明開辦仍著岑春煊隨時督飭認真經理以裨大局而保利權黎國廉梁慶桂李肇沅既據查明尚無抗捐情事均著開復原官原銜番禺縣知縣柴維桐辦事操切著卽行撤任察看○戊子諭唐炯奏年衰病劇應請開去礦務差使一摺唐炯辦理雲南礦務多年運解無誤尙有微勞著加恩寬恕原銜准其開去差使所有該省礦務著責成丁振鐸督飭藩司妥爲籌辦○財政處戶部奏閏四月初三日准軍機處鈔交商部奏籌辦商業模範銀行請准立案一摺奉 旨財政處戶部議奏欽此原奏稱東西各國除中央銀行外商業銀行林立中國商務渙散母財缺乏以致興辦農工路礦各項實業集款爲難上年戶部奏辦銀行實具中央銀行之規模而商業銀行除候補五品京堂林爾嘉候選道周廷弼稟請承辦外繼起尙未有人亟應從速籌辦藉資模範擬由該部籌撥官款并招集商款合銀一千萬元作爲股本收足三分之一先行開辦俾商業有所取法以後漸次推行與戶部銀行交相補助實於中國財政深有裨益查戶部右丞王清穆右參議熙彥均於財政講求有素擬請派充該銀行總理等語臣等伏查銀行者流通國法之樞機維持商務之根本今觀東西各國有中央銀行復有普通勸業儲蓄各項銀行羅列全國者其制度約有兩端一爲國家銀行由國家飭令設立與以特權凡通用國幣發行紙幣管理官款出入擔任緊要公債皆有應盡

之義務一爲民立銀行爲商民之所請立必由政府批准然後開設大旨皆與商民交易凡其集股數目營業宗旨以及一切辦法均當呈請於戶部而款項營業情形仍隨時報告以上各種銀行戶部皆有統轄查考之權且各設專條以監督之誠以銀行爲通國財政所關實戶部之專責也中國現當整飭財政之時凡劃一國幣辦理公幣洋款銀行尤關緊要若無管理之規條恐各項銀行必致自爲風氣則財政仍無整齊之日是以中等參考國家銀行之制設立戶部銀行上年開辦以來略見成效正籌推廣以立中央銀行之基礎現在復遴選通曉銀行章程人員參考東西各國規則釐定各種銀行以及普通農工商業儲蓄各銀行銀號無論官立民立均應遵照辦理庶盡中等管理之責而期與各國成法相符今商部奏請籌辦商業模範銀行意在提倡商務振興實業惟該號既爲商人所取法自應照商業銀行辦理現今戶部商業銀行條例尚未告成未能與以定法惟查日本正金銀行條例內載正金銀行司理人就五十股以上之股東中選舉總理由司理人中互選應就大藏大臣之許可但大藏大臣有時得命日本銀行副總裁兼正金銀行總理或命正金銀行總理兼日本銀行理事等因比例參觀是商業銀行總理應由股東內選舉雖有可用官員之時亦應由臣部選派今商部於該銀行徑行奏派丞參總理不合商業銀行辦法所請立案之處礙難照准統俟專例擬定頒行後再令請設之商業銀行一切查照辦理以

歸一律得 旨如所議行○外務部奏光緒三十二年二月二十一日奏請 臣部司員需人隨時調用京外各官及卒業學生到部行走等因奉 硃批依議欽此欽遵在案數月以來 臣等遵將前奏事宜悉心考求詳籌辦法前奏內稱無論京外現任候補候選各官及各學堂卒業出洋留學卒業各學生擇其品端學優事理通達或嫻習各國語言文字或研究中外政法條約者隨時咨調到部等語查交涉文件應從主國之制惟英法兩國語言文字實為環球諸國所習用尤應兼通博習以窺窺要而運機宜 臣部現有司員選取皆憑考試於漢文案牘似能勝任即研究中外政法條約者亦尚不乏其人惟於外國語言文字講求甚夥嗣後需用人員應先就兼習各國語言文字曾經出洋或曾在各省辦理洋務者擇尤調取至卒業學生亦宜先儘曾經留學歐美各國及日本者而專在本國學堂肄業者次之庶可以力爭上游而實收得人之效前奏又稱咨調到部分派各司額外行走試看一年如果才堪造就再行奏留酌定歸何項班次候補如有實不副名未能得力之員仍即咨回以昭慎重等語查 臣部四司各有專職從前司員到署分司治事藉資習練現在變通辦法除 臣等稔知隨時奏調擅用外其餘咨調之員概不分司先就所能將 臣部預為籌備事宜責令調查以覘其學再將 臣部交涉重要案件責令試辦以練其才數月之後優絀自呈果能名實相符自當即時拔擢若其未甚妥協亦宜照案咨回原奏試看一年本為

慎重取舍起見然爲期過久而長才不免屈抑庸流轉樂浮沈故奏留咨回之期不必定以一年爲限以上兩事皆仍本原奏之意而或則補其闕漏或則加以發明誠以立法不厭求詳而取材必期適用也且前奏有所未及而於茲事頗有關係者臣等請更連類言之其一曰專任用功名之士亟思自奮使不預懸一鵠使其知所趨赴則人皆將觀望而不前臣部司員既經停止保送考試嗣後司員缺出新調人員與舊有人員一體酌量序補至各國使署參贊領事隨員繙譯向章可由臣部司員充當惟每館或僅派一人或未派往嗣後各國使署所有參贊領事隨員繙譯應專用臣部所調人員充補至如何遴選派委之處容俟臣等歸入整頓出使章程中一併核議另行專摺奏定又各省交涉日繁大都設局辦理俟臣部所調人員造就足用之後各省將軍督撫需材贊助應准其隨時奏調以期得力其二曰嚴考察錄用之途既廣甄別之法宜嚴調員到部學習辦事自宜分定責任訂立規條無論官階大小一經到署均宜恪遵若不服從便當撤退其有沾染汚俗不自檢束者尤應嚴予擯除以爲害羣之儆其三曰優廩餉臣部各員所得廩俸不可謂薄惟新調人員不能遽得實缺區區津貼安足驅縻且各省出色人員大都身兼要差所入較爲豐贍至留學外國畢業諸生各省設立學堂相需甚殷多出重金爭先延聘若使相形見絀安能招之使來欲廣搜羅宜優俸精新調人員到署均擬優給薪水分別等第一以造詣之深淺資

和之先後爲衡但能得一二真才而 國家已隱受無窮之利益重祿勸士有固然已特是欲行一政不可不整其機關欲舉一事不可不完其組織機關不整則對於內必有局勢渙散之虞組織不完則對於外難收呼應靈通之效以上所陳各節事情極爲繁重若非特設處所派員承辦不足以資盤費而專責成臣等公同商酌擬於本署設立儲才館一所凡有調用人員及凡與有關涉之事均由該館經辦謹擬具章程二十五條另繕清單恭呈 御覽現在創建伊始規模簡略應用經費約計每歲需銀四萬兩當可支辦卽由臣部就出使經費項下解撥嗣後如須推廣再行奏請量予增加至調用人員駐館辦事所需堂舍必須另行興築方爲合用惟因亟於開辦祇可就臣部衙門現有房屋酌加修葺俾資應用得旨如所議行○己丑商部奏光緒三十二年四月二十八日准軍機處片交御史顧瑗奏請廣設工藝廠自造機器一摺奉 旨商部議奏欽此欽遵鈔交到部查原奏內稱自上海製造之局立繼而各省仿行鑄幣鍊鐵紡紗織布造紙等廠廣興辦然器非我自造其用卒不靈衡非我素知其事必不善況中國各機廠每購一大機器動糜數十萬金洋匠指揮工資尤鉅是我國機機器之用尙遠待諸異時而洋人售機器之利已收效於俄頃日本於三十年前貨物半取給於歐美邇來機器自造入口日少尤能行銷各邦中國工匠亦有獨出心裁自造各種機器者力薄不昌良用惜之請 飭下各省將軍督撫略仿日

本廠兵工廠成例於製造軍火之暇兼造各種機器擇其便於中國者每購一具以爲模範輾轉傳習民智自開挽回利權莫先於此亦知各省款項難籌然事不爲則不成法不備則不舉此又全在各疆臣竭力提倡不可畏難等語臣等伏查振興工藝推廣製造首以自造機器廣爲傳習爲入手不易之方中國工業萌芽端資提倡而欲規一時之美利必先復已失之利權該前御史奏請仿照日本廠兵工廠成例請飭下各直省於製造軍火之暇兼造各種機器招工設廠輾轉傳習不但廣開民智兼可預杜漏卮洵爲目前急務查各省所設機器局以上海之製造局漢陽之鐵廠規制較爲詳備此外福州船廠經歷任將軍總督規畫日久成效較著北洋德州機器局亦經督臣袁世凱締造經營力求完備於各省爲最能否如該前御史所奏於製造之暇兼造各種機器應請 旨飭下該將軍總督等通盤籌畫竭力推廣該將軍總督等公忠素著諒不至藉詞諉卸置爲緩圖此外各省已設機器局廠之處亦應各就地方情形勉力籌維以期逐漸擴充仍隨時奏明辦理其中國工匠及出洋畢業生果有能獨出心裁製造機器限於財力未能獨自任辦者在京准報明 臣部在外准報明各省督撫考驗真確有裨實用准其酌借官款俾助其成或由各廠隨時訂用庶工業可興而利源亦不至外溢矣得 旨如所議行○壬辰 上詣

大高殿祈雨○上恭迎 慈禧端佑康頤昭豫莊誠壽恭欽獻崇熙皇太后還宮○癸巳陳夔龍奏蘇

省田房契稅向多漏匿經前協辦大學士臣剛毅奏明整頓復經前督撫臣飭由司局酌定年限兵燹以前不究自同治三年起至光緒二十四年止除原額印單管業者不問外其餘展轉售賣之產業令現在管業之戶補稅從前白契概不追求並因此三十餘年中民間置買田產價值參差不齊從寬核定劃一之價每田一畝作價六兩每地一畝作四兩如礮薄田地不及六兩四兩者仍按原價投稅光緒二十五年以後則令遵例按照契載買價定限完納會同奏奉 硃批知道了酌定稅契章程甚屬妥善倘有不肖官紳勒索阻撓即著從嚴參辦欽此欽遵在案旋於光緒三十年因稅契收數仍未起色仿照江甯辦法改用官板契紙其未用官契以前之契則令趕緊補稅仍黏司頒契尾是年稅銀收數即較前數年稍旺現將各屬所頒契尾官契張數按縣查核不特民間置買田房並未盡用官契即舊契之限令六月補稅者數亦無多實因各牧令以稅契多寡無關考成不甚措意以致仍前疲玩查各省分認籌款案內欽奉 上諭仍飭將田房稅契切實整頓則稅契一項本為各省應理之財且置產之人皆屬有餘之戶揆諸食毛踐土之義宜盡急公奉上之忱現在銅元奉文限鑄餘利甚微而練兵興學警察工藝諸要政無不待款而行值此庫儲支絀之時自應將蘇省契稅循照從前奏案年限及現行官契明定章程分具大綱為二一曰清匿稅一曰稽現稅大綱中又分目為二一曰定稅價一曰減稅耗於整頓之中復曲加以

體恤所有從前舊丁役浮費一概革除由司分委委員會同知縣認真經理不涉書吏之手並不准於正價外有絲毫之費以期歛集而民不擾值此時艱財匱無論爲官爲民允宜同報 國恩各盡義務如有勒索阻撓等弊惟有欽遵 諭旨分別從嚴參辦以示懲儆下戶部議奏○甲午以崑源爲三姓副都統○外務部與法國使臣議結南昌教案並訂善後合同其文曰爲立合同事近因南昌滋事殺斃法人焚燬教堂學堂一案大法國 大清國政府均願將此案公平議結以期兩國交誼益敦和好已經商定各派委員會同查明辦理大法國欽差特派三等參贊官世襲子爵花翎頭品頂戴端貞 大清國外務部奏派直隸津海關道花翎二品頂戴梁敦彥前往南昌詳細查明南昌縣知縣江召棠身故緣由本年正月二十九日南昌縣知縣江召棠到天主堂與法教士王安之商議舊案彼此意見不合以致江令憤急自刎乃因該令自刎之舉傳有毀謗法教士之訛以致出有二月初三日暴動之事中國 國家已自將有罪之人懲辦茲將外務部與駐京法國欽差議定各條開列於左免致嗣後彼此或生異詞 第一條 應給被害教習五人家屬撫卹銀四萬兩另給一萬兩作爲後來新教習等川資經費之用其款應以庫平庫色兌交駐滬法國總領事收領 第二條 南昌等舊案及南昌新案所有被毀教堂學堂義橋院等處及教內之人房屋並一切物件總共賠償銀二十萬兩整交由教堂提款償補各案教內之人



之損失作爲一律了結 第三條 第二條所載庫平庫色銀二十萬兩分爲十次交付每三箇月爲一期二萬兩交由法國主教在九江收領 第四條 所有被燬教堂各紅契應由地方官從速補給管業執照並在南昌縣城內借予教堂房屋一所以待教士蓋有房屋卽行遷移 第五條 江西巡撫應行從速出示曉諭其告示底稿已經外務部與法國駐京欽差會訂 以上各條分繕華文法文各四分其一存外務部一存駐京法使公署一存江西巡撫衙門一存九江天主堂○是月法蘭西國新聞駐華使臣巴思德抵任

臣朱壽朋敬編

臣汪錫增恭校

五月丁酉朔夏至節大祀 地於 方澤 上親詣行禮○~~我~~我輪船駛抵汕頭端佑康頤昭豫莊誠

壽恭欽獻崇熙皇太后懿旨春煊泰廣東廣肇高欽等府州屬被災情形一摺本年入春以後廣州等  
屬大雨如注西北兩江同時暴漲以致圍基衝決桑禾俱損房屋倒塌多傷人口災民蕩析離居覽奏殊  
深憫惻著頒發帑銀五萬兩由廣東藩庫給發卽著該署督迅飭派出各員認真察勘妥籌賑撫毋任一  
夫失所用副朝廷軫念災黎之至意○庚子兩○上御乾清宮法國使臣巴思德覲見呈遞國書○辛丑  
命孫寶琦幫辦津鎮鐵路○商部奏請頒發蘇省商辦鐵路關防得 旨如所議行○喬樹枏奏請各省  
設立法政學堂下學部知之○財政處戶部奏請法爲立國之原其權固宜操之於上紙幣爲便民之計  
其制尤宜慎之於先臣部前因銀行業經開辦當卽奏明派員前往日本考查紙幣印刷事宜誠以紙幣  
之行全恃信用一經作僞其害不可勝言唐之飛錢宋之交會實爲中國紙幣之始當時議者尙謂以輕  
代重以虛代實深慮僞造日多勢不可久要知紙幣原冀商民利便實爲財政之機關果其立法之初詳

審周密先求盡善必能全收其利而不受其害東西各國於發行紙幣以及一切簿籍契券各項官紙凡有價值者皆由政府主其權嚴防民間之私製其有私造者從重科罪而尤恐人心徇利甚於畏法故於造紙印刷之事特注重精益求精務使民間無從仿效其造紙也選料程功必得質地勻潔堅韌與尋常束楮迥異更加以水印暗花爲特別之記認是未經印刷之先已隱寓防弊之法其印刷也以機器精鑄銅版極求工細煉製印色備極鮮明又益以電胎銅版鑲出分印雖累萬億而毫釐不爽務使製作精工人人能辨真僞是皆預求立於不敗之地而無作僞之虞惟造紙之與印刷其體則合而爲一其事則分而爲二必各設一局以求精進造紙必擇原料最富水性相宜之地建廠添造印刷一事其工作均從事於機器而電胎製色二種尤係專門科學非得有專精此藝之技師教習不易措手則其建設自以購運機器延聘技師於適中便利之地爲合宜而尤必與臣部及發行紙幣之總銀行相近庶便稽查以上二局設立之地應各求其宜不必定合於一處考之各國莫不皆然臣等現值整頓財政之時亟宜參酌採取妥爲籌辦以立基礎統俟考察之員回京再將局廠建設之處暨派員經理一切事宜妥議章程奏明辦理得旨如所議行○二黃廷杰奏查接管卷內據華商王紹林洋商伊德等合辦震家地等處礦務一案經前任都統色楞額奏奉部議所有集款分利招工購地各事宜在在均關緊要必須參酌

合同始能定議等因嗣據該商等呈送華洋簽字合同二紙稟請核咨經前任都統松壽分別咨存在案  
奴才到任後復准外務部咨開該商等稟請訂立合同應仍由熱河都統奏明辦理以符原案各等因當  
查原訂合同內所有集股分利招工購地各事宜雖經分項註明與部章尙無違背然語意究多含混卽  
如所指礦地六處除原案所稟寶家地一處外其餘五處將來如推廣開辦自應遵章另爲稟請執照另  
交礦費另起課銀並訂明開辦期限通限不辦礦產仍歸還國家原訂合同並未敘及又合同十三條有  
無意中採得別種礦質卽應稟請給照辦理等語雖經稟准有案然亦祇能在稟准礦地界圖內照章開  
辦納課方免牽混原訂合同亦未詳細聲明國家利權所在華洋交涉所關事前多一磋商庶事後少一  
轉輾自應傳詢該商重加商訂以昭慎重正札仰問適值王紹林偕英商譚華卽伊德之代表人來熱據  
譚華呈驗伊德所給權柄單一紙以昭憑信緣向來外國人辦事本人因事不到卽以此項權柄單交代  
表人作爲承認之據奴才因將合同內語意含混之處分別摘出飭該商等另議附約三條以發明原訂  
合同之所未備當經遵飭議呈以爲永遠存據之證查近來華洋礦務交涉之案層見疊出熱河礦產股  
富外人時有覬覦惟於合同內將彼此應得權限預爲聲明究可省日後無窮之轉輾奴才爲慎重礦政  
預杜交涉起見未便以原定合同業經送部稍涉疏略致滋流弊下部議奏 附合同 光緒三十二年

閏四月十四日即西歷一千九百零六年六月五號華商王紹林英商伊德代表人譚華遵熱河都統廷  
杰面諭另議附約三條分繕三紙經華洋商人與求治局會辦分省試用道何鼎璋押一紙繳存求治局  
備案一紙交英商伊德代表人譚華收執一紙呈繳都統以便奏咨定案遵辦 一部章指開各條理宜  
遵辦茲特揭出數條開列於左 集股所有續招股銀均須華洋各半 分利原訂合同第八條業已載  
明收取課銀當再由都統派員監收 招工原訂合同第十六條內業已聲明礦廠除管理機器外一切  
工人概用華人不准招僱洋工 購地山主契據應全呈驗原訂合同十七條內所載應造枝路所佔民  
地如地主不願出賣願將地價作股應由地主之便不得擅用壓力如願出賣糧租仍照原訂合同第五  
條完納 一原訂合同內所指六處礦地除所稟請霍家地一處外其餘有城子山王家杖子五臺山白  
山吐柴火欄子五處如該商等推廣開辦務須遵照部章稟請開辦執照並另交礦費另起課銀以上所  
指各礦三年內如不開辦即須歸還國家 一原訂合同內第十三條有無意中採得別種礦質即應稟  
請都統給照照章辦理等語惟所稱無意中採有別項礦質祇准在已經稟請批准開辦礦地界圖內照  
章開辦納課等外務部商部奏查原約第一條所用如續招股銀須華洋各半收取課銀由都統派員監  
收礦工概用華人佔用民地不得擅用壓力並第三條所開無意中採有別種礦質祇准在批准界內開

辦各等語皆爲原訂合同之所未詳防閑自較周密惟第二條內開原訂合同所指六處礦地除霍家地一處外其餘有城子山王家杖子五臺山白山吐柴火欄子五處如推廣開辦須遵部章稟請執照等語查王紹林稟原案祇請開辦霍家地暨城子山王家杖子三處礦地嗣經前任都統色楞額奏該員照章洋合辦之例與洋商伊德發訂合同推廣至五臺山等處業經外務部核與原案不符現在核訂合同自應仍照原案准辦霍家地等三處此外不得預爲指定礦地多處致滋弊混至霍家地一處既經前任都統發給執照准其開辦應由熱河都統即將該礦佔地詳細里數四至界限繪圖送部查核飭令取具保單照費換領部照以符定章其城子山王家杖子二處將來如推廣開辦應卽一切遵照商部奏定礦章呈候核准由部頒領執照再行開辦仍照熱河都統原定阿約三年內如不開辦卽作罷議如有他商請辦該公司不得干預又原合同第六條所指各礦必須由官發給執照應改爲呈明都統咨請商部發給執照方准開辦第七條不得私將執照轉賣他人一節應照商部礦章改爲如欲將執照轉授他商應具稟商部聽候准駁倘私相授受一經商部覺察卽將礦照撤銷礦工入官第八條常年課銀認交一千兩礦產出井之金按值百抽六銀按值百抽八呈交課款應改爲礦產出井金銀均按值百抽十完納井口稅其出口之稅仍遵海關稅則照章交納查原訂各節雖係按照熱河礦務專章辦理惟現定部章礦產

出并稅金銀均值百抽十自應改歸一律熱河原議每年認交課銀一千兩應予刪除先交之銀並准抵完礦稅第十二條日後如各國欽使與中國國家定立各項礦務新章亦應援章辦理應改爲日後中國國家定立各項礦務新章該公司亦應遵照辦理第十七條修造枝路以便運銷礦產應照商部礦務章程改爲轉運礦產欲造小枝鐵路應查明相距水口是否在十里以內與該處地方有無窒礙應候商部核奪若程途在十里以外者應另案辦理於第十七條後添敘一條聲明此項合同未經駁載各事概照商部奏定礦務章程辦理以上各節應請 飭下熱河都統轉飭該商等遵將原訂合同並此次附約重加審訂咨部核定再行畫押以重礦政得 旨如所議行○癸卯兩○乙巳 上詣 大高殿報謝○己酉 慈禧端佑康頤昭豫莊誠壽恭欽獻崇熙皇太后 皇上御乾清宮義國使臣巴樂禮偕同義國親王寶爾迪安德親見○上表 慈禧端佑康頤昭豫莊誠壽恭欽獻崇熙皇太后幸頤和園駐蹕○外務部商部戶部奏竊商部於光緒二十九年十月十四日具奏重訂鐵路章程繕單呈 覽一摺奉 旨依議欽此通行欽遵在案查原章第四條內開公司買地應由地方官估定公平價值毋許高擡應完地租由公司按年認繳不得拖欠等語是鐵路佔地納稅早已載明定章現在各省路務先後開辦縱橫綿互佔地日多此次地稅應再切實申明俾有遵守凡各省官紳承辦鐵路所有佔用地畝除官道官河向來

本不納稅應毋庸議外其購買民間地畝一經過劃撥隨地轉卽由各該州縣會同該處辦路官紳勘丈  
明確仍照原額科則歸入鐵路公司卽應繳納若干務與原數相符不至有虧正額至借款官辦各路其  
合同條款切實載明不納地稅者暫行免收一俟合同年滿應卽照繳嗣後官辦商辦各路均不得率行  
請免賦稅以重稅課而符定章得 旨如所議行○商部奏 臣部於光緒三十一年六月間接據浙江京  
官翰林院侍讀學士黃紹箕等呈請由本省紳商自辦全浙鐵路公舉前署兩淮鹽運使湯壽潛候補四  
五品京堂劉錦藻總理其事等情當由 臣部於七月二十六日據呈奏請奉 旨湯壽潛著賞給四品卿  
銜餘依議欽此嗣經 臣部傳知該紳等欽遵辦理並令通盤計畫妥訂詳細章程去後復據該紳黃紹箕  
等呈稱京外紳商函電往復遵照商律公同集議詳晰釐訂章程十章八十三節繕具清摺呈請立案又  
准大學士王文韶刑部尙書蔣寶華戶部侍郎陳邦瑞刑部侍郎沈家本工部侍郎胡燏棻等函同前因  
並稱全浙鐵路旬日間集股二百餘萬目下正在續招此項章程由該總理湯壽潛等會同中外官紳士  
商切實酌擬經文韶等閱定應請核准飭遵各等語 臣等伏查浙江全省鐵路關係交通至爲重要該省  
京外紳商和衷商榷力自辦洵屬顧全大局所訂路章大致遵照 臣部奏定公司律有限公司辦法於  
股東董事查帳人辦事職員各項權限分晰至爲詳審自足以互聯團體預杜流弊自應准予立案謹將



該紳等原擬章程敬繕清單恭呈 御覽如蒙 俞允應由 臣等傳知該紳等咨行該省督撫欽遵辦理  
得 旨如所議行○庚戌兩○前據御史黃昌年奏參江西藩司周浩執法徇私各款當經諭令張之  
洞確查茲據查明覆奏該藩司貪污縱恣把持銜樞專任私人貽誤大局周浩著卽行革職至開辦銅元  
購辦機器諸多不實不盡及官銀號款項並未移還著吳重熹再行澈底嚴查照數追繳以重公款江西  
補用知府羅湘鐵營膠妄生事害民永新縣知縣張晉錫貪污卑賤小人之尤均著革職永不敘用江蘇  
補用直隸州知州吳懷實詐惡劣公款不清試用知縣黃錫光營謀著缺不知廉恥指分江蘇知州徐履  
泰鄺俗迎合多滋物議江西補用知縣張學勛歷充優差損公肥私試用道陳際清險惡招搖行同無賴  
均著卽行革職江蘇候補道繆德榮違例要差喪禮無能著勒令回籍候補知府王祖蔭巧滑專擅難資  
表率著以州同降補知縣桓祖彝品行卑污敗壞風氣丁憂知縣崔寶琰行徑狠鄙指摘交加知縣朱士  
元倚勢招搖聲名極劣試用巡檢蕭鴻品行污下衣冠敗類均著卽行革職蔣友華枚生著查明有無職  
銜卽行斥革並遞解回籍交地方官嚴加管束華玉堂瀾心貪瀆履歷均著一併驅逐不准逗遛江  
西司事金朝正著拿獲交地方官嚴加管束家丁熊慎著拿獲解回原籍禁押一年限滿仍嚴加管束不  
准出外生事餘著照所請辦理該部知道○惲毓英 臣等見四月間江蘇督撫因調劑屬員擬將地丁

錢糧每兩加收制錢二百文經戶部議駁乃一再瀆請本月又有加收上忙之奏仰維 皇太后 皇上軫念民艱無時不以蒼生爲意故上月二十日恤民之 詔甫下 天心感應立沛甘霖寰海內外咸歌

仁德該督撫 臣身膺疆寄不能仰體 聖慈期月之間重徵之疏三上首加牙帖向之每年徵銀五兩

者今則加十倍而徵五十兩矣次加稅契凡光緒二十五年前大學士剛毅已經清釐限定之數今則復加搜剔新舊遠近纖悉不遺矣乃復聽信屬員之環壘請加賦併力兼營同時並舉 臣恐東南民力盡矣查二十八年督 臣劉坤一以賠款甚迫奏請於定價二千文之外加收錢二百文以抵賠款當日卽以規復同治七年舊價爲詞今該督撫 臣乃忽以新加二百文納入舊價之內撥還各州縣屬而另借賠款名目再加二百文設使將來州縣困窮又可以二千四百文爲舊價再擬酌加矣查該督撫原奏一則曰州縣公費太少再則曰州縣辦公竭蹶是祇知體恤屬吏而不知體恤農民屬吏不足於民取價民間不足將於何取價乎且新政之行無非爲保安民生而設 臣竊見各省大吏動以舉辦新政爲詞爲竭澤而漁之計是行政之效未見而屬民之害先形恐亦非 聖主制治保邦本意也可否 飭下戶部體察情形妥議覆奏再 臣聞該督撫 臣一面奏請一面已通飭各州縣加收民間方以銅元價賤日用物價因而增長度日維艱今更加徵丁銀折價小民勤勤終歲不足自給其苦可知督 臣乃謂民情相安似非實事

若謂各州縣已有加收之處應由戶部飭令流抵下忙完數不得遲緩其間款歸中飽又奏近來時局日  
新民財日困州縣之辦事益艱而聚歛之心亦益急不肖者但爲取盈之計不復爲久遠之謀吏治之壞  
原本於斯此次江蘇丁銀加價戶部以恤民爲心或始終持平讓駁但恐該州縣等必不甘心將設法取  
償於後臣愚請 飭下江蘇督撫臣嚴飭各州縣徵收丁漕凡民間完納銀元應照市價折錢不得違例  
不收銅元自定權價至冬漕折價屆時藩司應照市價核定不得擅價病民如大吏徇情庇護一併參處  
庶措克無所施而小民受惠無窮矣下戶部議奏○辛亥以沈瑜慶爲江西布政使朱壽鏞爲廣東按察  
使○商部奏臣部接據上海南北市錢業元大亨等合詞稟稱錢業定章遇有來往商號因虧倒閉所欠  
洋款莊款須俟結清後於欠戶還款內按照成數攤洋各商一律公攤歷經稟辦有案今各省分滙銀行  
官銀號既許各商號脫手往來與莊等同茲利益自應與莊等同其責任設遇倒閉虧欠亦惟查照定章  
於欠戶還款內按成均攤乞咨請財政處立案等情核與臣部會同修訂法律大臣奏定破產律第四十  
條帶項公款經商家倒閉除賠償成數仍同各債主一律辦理外地方官應查明情節如果事屬有心應  
照倒騙律嚴加治罪等語尙屬相符當經據情咨商財政處去後旋准覆稱查各國銀錢行業皆受成戶  
部或且以資本之半存之中央金庫而所用簿籍戶部併有隨時飭令檢查之權查察極爲嚴密不愚有

欺飾瞞匿之弊是以偶遇虧倒破產之法可以實行今中國各項貿易皆任便開設公家並未加以監察若遇有倒閉准其一律折扣恐存主受虧必甚現在戶部銀行存放多係部款關係極重暨各省官銀號銀行多係公款均應暫照舊章辦理所有該商稟請立案之處礙難照准等因等查破產律第四十條商家倒閉帶項公款歸償成數同各債主一律本係查照各國通例辦理俾昭平允茲准財政處覆稱前因自應將此條暫緩實行報聞○甲寅商部奏西潼鐵路加徵土釐作為路股俟工程告竣即行停徵得旨如所議行○乙卯兩○以黃培松為廣東瓊州鎮總兵○丙辰袁世凱奏前准政務處咨開准學務處咨奏覆專設法律學堂暨添設仕途速成科一摺於光緒三十一年七月初三日奉 旨依議欽此錄奏咨行前來查原奏內聲明請飭下政務處通行各省並查取直隸法政學堂章程參酌認真辦理等因當即將現行章程錄送政務處備案並咨行各省查照各在案臣維作始貴乎審慎立法不厭周詳矧法政學堂為他日創制之本原自強之基礎非有專門學問者恐不免有輕重失當之虞故雖試辦半年未敢形諸奏牘現飭該司道等督同留學畢業生詳加釐訂業據再三斟酌議覆前來就原章學科辦法與管理規則分為兩編其關乎學堂全體大綱不容輕易刪改者謂之學堂章程其堂中管理條項臨時可以酌量增減者謂之管理條規章程以垂久遠條規得由管理隨時損益此其大略也至其大要約分四

端一曰學額蓋佐理新政莫急於得人澄清仕途莫先於興學原擬專招本省候補人員不拘班次大小但年齡文理合格者均得入堂肄業嗣後經臣奏明將安徽等省舉人揀發來直並令入堂畢業後分別奏留以供任使至本省士紳各署幕僚皆有佐治之責亦分別籌設學堂兼營併進庶幾人知法理戶解律文政治改良此爲樞紐二曰課程政治專門浩若煙海非資深造難言大家然而求治之殷安能坐待著籍之士已逾學齡是用採擷精英企圖急就分設科目頗費籌商先授礮科半年以植其基繼授正科一年又六月以廣其用律例會典成案約章爲仕途者所必知先須注重其他民刑等諸法與夫憲法經濟等諸學皆當探東西之長以收甄採之效三曰管理向日之課吏館不過如舊時書院既無講堂授課之事卽乏羣坐習業之儀今既改學堂自當悉遵通則擬興飲食有定時藏修息游有常度總期在堂人員莫不有推崇公德之意以習於確守規律之常四曰經費舊有課吏館常款歲需庫平銀一萬四千餘兩今改學堂除活支外歲需額支庫平銀三萬一千四百餘兩所短之數均由藩司撥補惟以各省情形不同未便列入定章致多窒礙臣覆核之餘尙屬妥善除飭令該司道等按照新章切實辦理並分別補咨外理合繕具清單恭呈 御覽下所司知之○己未商部奏光緒三十二年五月初六日准政務處咨議覆直隸總督袁世凱奏請另行核議路務議員一摺於五月初五日具奏奉 旨依議欽此欽遵鈔咨

到部原奏內稱擬請 飭下商部將各省路務事宜詳細調查妥訂規則頒行遵守其度材用人工程運輸款項一切仍責成該管大臣督率在事人員認真經理隨時咨報商部考核分別准駁部中亦可隨時據派妥實司員分往考察報部咨行該管大臣查照整頓如蒙 俞允其商部所訂章程內有應行刪改之處應由該部自行酌改以期周密而便遵行各等語此案先於四月間由直隸總督袁世凱鈔錄原奏咨會前來臣等伏查中外古今治亂之關鍵惟一言以決之曰通與隔而已周易否泰之機卽通與隔之所爲倚伏自古內外上下之情通則諸事聯絡而政治以理內外上下之情隔則諸事叢蔽而政治以紛臣部議員之設意在通內外上下之情非特輔臣部智慮之所未周正所以佐各管路大臣暨辦路地方各督撫耳目之所未逮也此不必遽徵之東西各國卽以中國體制言之各省關道得與外務部戶部直接督糧道得與戶部直接新設之提學使得與學部直接皆所以廣備諮詢用便考察其大要均在化隔爲通初不致有侵犯權限之弊是以臣部原訂路務議員章程十二條大概注重調查報告俾得隨時稽考以期興利除弊此次議員雖係臣部札派而查照原訂章程第一條第四條第十條仍載明由管路大臣辦理地方督撫咨送履歷出具考語查得聞見所及仍隨時稟報管路大臣辦路地方督撫核辦權限本極分明各議員身爲僚屬亦何敢侵越管路大臣暨地方督撫權限至第二條所載臣部章京及畢業

學生得派幫辦路務在臣等議訂之意不過以臣部章京現既就畢業學生內調充將來或有熟習路務專門之員不必因臣部一經調用遂令無地以見專長而各路需才孔亟正可令其實驗以資贊助其才難得要政所關臣等初不敢存內外畛域之見第三條三年考成一節係指臣部給札三年以後而言各處承辦路工人員功過臣部原有稽核之責即不敢無懲勸之條至各該議員之黜陟進退仍係各該管鐵路大臣暨辦理地方督撫之權臣部未便干涉第五條議員久任一節誠以各省舉行新政百端待理才識較優之員往往檄委過多不能久於其職既由臣部派充議員如有別項差委自應咨商臣部俾可接洽另行遴派委員此亦尋常辦公例有之事第十一條路務議員逕覆臣部一節是即為掃除隔膜起見至該議員調查之事由臣部咨會各督大臣及辦路地方督撫既非議員之責原訂章程內是以未經敘明按照袁世凱原奏內稱臣非謂議員不當設使商部遴派議員調查各項事件舉凡當興當革當損當益之故一一周稽博考洞悉靡遺呈由商部詳加採擇訂為章制通飭遵行或咨商管路大臣等查核辦理即於部務為盡職於路務為有益等語是其意亦在通內外上下之情揆諸臣等訂章之意原無不合之處要之邇來朝廷注重路政臣部職任所在不得不加意周詳祛除積習政務處覆奏所稱補偏救弊實備知臣等苦心現在既經奏奉諭旨由臣部自行酌改章程臣等公同商酌謹將章程第二第

三第五第十一四條妥爲改訂繕具清單恭呈 御覽如蒙 俞允再由臣部通行遵照辦理竊維方今時事多艱全在內外協合上下通徹庶足以佐成要政宏濟艱難此臣等所日夕兢惕冀有以仰副 恩命而亦竊願與各疆臣各管路大臣共勉之者也得 旨如所議行○辛酉戶部奏內閣鈔出兩江總督等覆奏蘇州徵收三十二上年上忙銀價仍請每兩加錢二百文湊抵賠款照案帶徵一節光緒三十二年五月初五日奉 硃批戶部知道欽此欽遵又據翰林院侍讀學士惲毓鼎奏疆臣藉詞加賦請 飭部妥議並各州縣徵收丁漕完納銀元應照市價折錢各摺片均於五月十四日奉 旨戶部議奏欽此欽遵由軍機處交出到部據該督臣等覆奏大略謂蘇省銀價驟漲各州縣徵收丁糧每兩折收二千文入不敷出請於上忙加收折價錢二百文共合二千二百文以符同治七年收數其賠款仍帶徵二百文照案徵解現在各屬概已取徵民間完納均尙相安懇請 恩准而該侍讀學士惲毓鼎所奏則以當日繳抵賠款卽以規復同治七年舊價爲詞今該督撫臣忽以新加二百文納入舊價之內撥還各州縣縣而另借賠款名目再加二百文惟知體恤屬員而不知體恤人民且一面奏請一面通飭各屬加收民間錢賤物貴度日維艱今更加徵丁銀折價小民不足自給其苦可知督臣乃謂民情相安似非實事又另片奏徵收丁漕民間完納銀元應照市價折錢不得違例不收銅元自定槓價等語臣等竊維國以民爲本



設官原以保民從未有剝民以肥官者也前該督等以銀貴錢賤請將賠款規復之二百文撥還各州縣而另行帶徵二百文以作賠款經臣部議駁奏請飭令照常徵解奉 旨依議欽此欽遵行知該省在案今該督等仍以前情一再續請如果應加前此臣部卽毋庸議駁卽此次該省京員亦可不必另行陳奏此其間誠有礙難照准者不得不爲我 皇太后 皇上剴切陳之查蘇省徵收錢糧自同治四年奏定每兩連公費折收錢二千文七年銀價每兩易錢一千七百文因加收二百文共二千二百文二十二年銀價減落仍復每兩二千文之譜至二十八年賠款急迫前督臣劉坤一奏請規復七年銀價每兩加收二百文是民間完納丁糧刻下固已二千二百文矣今該督等又以銀價與七年相埒完納二千二百文之外更請加徵二百文試問規復錢價之二百文出於各州縣乎抑仍是出諸民也若猶是出諸民也則合之各屬所收之二千文與同治七年所徵之數無以異若再加二百文則是每兩二千四百文矣增減固視乎時而目下該省錢價尙未至於此也況該督等前奏請將各屬所收規復銀價之二百文發還各州縣縣今則謂其賠款二百文原與銀價無涉顯係自相矛盾又稱各屬解徵一兩連補平火耗需錢一千八百餘文所餘公費僅一百數十文較同治四年所定相去已多等語查蘇省賦額除荒災蠲緩各項外每年所收正銀約一百二十三十萬兩以每年餘錢一百數十文計之約得銀一錢有餘合通省一年計

計之每年應得餘銀十四五萬有奇而每年漕費雜稅各款之所贏尙不在此以此辦公當可敷用而必援同治四年所定之數辦小民以取盈此則甚不可者也蘇省向爲財賦之區現在徵稅抽釐以及籌款之所加新政之所捐民力敝矣而獨於田賦總未議加者蓋遵 祖制以維民心耳該督等不爲黎庶之疾苦計而斤斤焉專爲屬吏之盈絀計毋乃輕重倒置乎獨不思州縣少收二百文未必卽形淡薄而閭閻再加二百文則將不勝困苦且向來各省奏請無不俟部覆然後開辦今一面陳奏卽一面飭徵未免輕易並稱各屬上忙概已徵民間完納均尙相安何以人言乃如是嘖嘖也 臣等正擬具摺奏駁適軍機處將翰林院侍讀學士惲毓鼎各摺片交到細繹該侍讀學士之奏與 臣等意見相合是以併案具陳懇請 飭下兩江總督江蘇巡撫蘇省本年上忙仍照常徵解無庸另行加徵其已經徵收之二百文應令流抵下忙正賦限文到一月內迅速刊發騰黃漏貼四境務使窮鄉僻壤概無 皇仁至該省徵收丁漕應如該學士所奏民間以錢折合銀元須按市價不准高擡更不准自定櫃價厚取於民其零星小戶准以銅元完納不得違例不收以致銅元壅滯如有不肖官吏隱蝕上忙加徵之項並收丁漕時高擡時價將錢與銀元往復折扣及不收銅元等弊一經查出或有人入告 臣部卽行從嚴參辦得 旨如所議行○壬戌諭禮部奏萬壽聖節禮儀一摺著在仁壽殿行禮停止筵宴餘依議

六月丙寅朔丁振鐸奏籌議會修騰細小鐵路下外務部商部知之○戊辰刑部奏前准軍機處交出給事中左紹佐奏新訂上海會審公堂刑章請飭部改訂一摺奉旨刑部議奏欽此當將原奏鈔交到部查閱原奏據稱上海會審公堂專司華洋交涉自宜參酌中西法律酌中定斷伏見此次刑部議擬兩江督臣周馥條陳變通公堂刑章所擬辦法有失之太輕者有失之太重者有難以見之實行者如原奏稱罰金十五兩工作至六十日又拐帶婦女及誑騙等案訂明管押日期以十日及百日爲限各條查上海五方輻輳爲神奸巨蠹出沒之所聞新應辦各案罰鍰有千金以上者監禁有十年二十年者嚴法以懲犯者尙復不絕今定罰金十五兩而止則措辦甚易工作六十日而止則日期甚淺恐此律一行作奸犯科之人必日多一日又如和姦定律杖八十新章則罰銀十兩上海風俗澆靡輕薄無行之人何惜此十兩之銀如是則人人可以犯姦幾於誨淫又如竊盜賊滿四十兩律定杖一百新章罰銀十五兩然則受罰之後尙可得銀二十五兩可以脫然無事如是則人人樂於行竊幾於誨盜至拐帶婦女例載被誘之人不知情爲首絞候爲從杖一百流三千里新章定管押日期以十日及百日爲限殊與成例不符此失之太輕者如杖罪改禁今欲自建一半經費尙苦無著不得不借禁西牢查上海西牢凌虐情形人言噴噴近年以來監斃不少華民無不視爲畏途向來公堂辦法惟定罪監禁半年以上者始行送入西

牢或暫押捕房捕房與西牢雖皆爲西人押犯之所而捕房較輕西牢較重今定杖罪皆借禁西牢蓋於西牢情形有所未悉耳查杖罪自六十至一百止照折作工自二十日至六十日止若照新章則判押二十日之犯卽須送押轉不如新章未頒之前尙得邀夫寬典此則失之太重者如原奏有交差取保之條不知外人言及中國差役則深惡痛疾以爲弊竇之尤原奏有交縣管束之條凡徒流以上均須移縣不知新廢除竊盜外並不移縣通融已久一旦紛更外人豈肯允從勢必空文爭執徒費筆舌此所謂難以實行者刑律關乎法權公堂係乎國體與其將來扞格於外人莫若今日預籌夫妥善等因奏奉 諭旨著臣部議奏臣等竊維上海爲通商大埠一切華洋詞訟案件繁多自非辦理得宜不足固法權而弭外侮是以去年十二月間臣部嚴覆署理兩江總督周馥電稱新章改作罰金貧民不名一錢無從可罰工勢尙未開辦無工可作現時到案人犯擬分罪名爲五等臣等當以差帶取保省釋並公堂暫押取保及交縣管束此三等尙屬周妥請如所議辦理惟笞罪改押公堂杖罪改爲監禁二等各按笞杖實數作爲押禁日期未免過重臣部聲明押禁日期卽照工作日數自罰金一兩折作工四日起以次遞加至六十日爲止等因奏准遵照在案是該督變通成法原期輕重略均而臣部衡量等差實恐增加過當茲據該給事中奏稱新廢罰錢有千金以上者監禁有十年二十年者今定罰金十五兩而止則措辦甚易工

作六十日而止則日期甚淺等語查停止刑訊係奉 特旨飭遵之事其笞杖等罪擬仿外國罰金之法凡律例內笞五十以下者改爲罰銀五錢以上三兩五錢以下杖六十者改爲罰銀五兩每一等加二兩五錢以次遞至杖一百改爲罰銀十五兩而止如無力完納者折爲作工應罰一兩折作工四日以次遞加至十五兩折作工六十日而止原以笞杖於五刑爲最輕故罰金之數不可過重卽工作之期不得過多此是各直省通行之定章不能於該埠而獨異至罰銀千金以上乾隆年間惟軍流等贖罪章程定有此數現在業已酌減至監禁至十年二十年之法亦僅施之於搶劫等項罪人絕無笞杖人犯照此定擬者卽使有之亦自該庫員不諳例章之過烏可執彼以例此乎且立法必有所限不能因措辦之易而譴增又豈得因刑期之淺而從刻言者不察但恐法律一行作奸犯科之人日多一日不知所犯者果係輕罪自可毋庸議加若係重罪仍不難執法以繩其後非謂罰金外遂無重刑也又如和姦律載杖八十例係滿杖加枷按新章滿杖應罰銀十五兩若非婦女仍當枷號似亦足以蔽辜原奏謂輕薄無行之人不惜此十兩之銀殊涉誤會又竊盜一項上年四月間已定有工作習藝章程如各省習藝所尙未設立者卽將現犯照應得工作期限暫予監禁本以竊盜藉擷取爲事論賊雖有多寡之分誅心實無輕重之別故較別項輕罪人犯及無知犯罪者辦理爲嚴該給事中謂竊盜賊四十兩律定杖一百新章罰銀十五

兩向可得銀二十五兩殆未見此奏定章程耳至誘拐婦女例載被誘之人不知情爲首絞候爲從滿流原指情節較重者而言若該署督前電所稱女犯向押公廨擬將罪輕者交親族或的保管束如拐帶誑騙之案訂明管押日期以十日及百日爲限等語係指罪在徒流以下者言之核與成例並不相悖故部議覆並飭令查照婦女贖罪新章分別辦理似不得謂失之太輕該給事中又稱向來公堂定罪監禁半年以上者始行送入西牢今定杖罪均須借禁則照新章判押二十日之犯卽須送押轉不如新章未頒以前待邀寬典等語查西牢凌虐情形該署督原電言之甚悉特以公廨押所容犯僅可百人自行建牢經費又難速措故不得不暫爲借押之謀部擬照作工日期定以六十日爲限之議卽是預防流弊隱與維持蓋以拘繫久則幽閉堪虞刑期淺則開釋較易既可令預有之押所及早騰挪尤可使寄禁之西牢得稍免苛虐煥斃之苦且臣等又恐該公廨恃有借禁之舉或遂苟且補苴日久終滋轉輾是以仍令趕緊改良監獄及創辦工廠等事以爲收回法權之計原摺具存當邀 聖明洞照似不得謂失之太重至中國差役向爲民害盡人知之全在地方官加意約束或冀稍挽頽風今該公廨既不能不需差役以供奔走則差帶取保之犯卽係立時省釋之人情事甚微不至多滋弊竇又所稱新廨除命盜外並不移縣一旦紛歧外人豈肯允從等語查原定會審公廨章程凡華民犯罪俟會審判定枷杖以下由華員

發落徒流以上歸上海縣辦理極限本極分明自各該委員懼怯無能遇事因循但知退讓馴至法權浸失遂視定章爲具文該給事中謂徒流並不送縣自係現在實情惟臣部議准交縣管束之條係專爲笞杖人犯而設笞杖由華員發落原屬自有之主權卽慮外人不肯允從亦儘可據理爭執未便隨時遷就況事由該署督發議公堂情事豈竟一無所知如果十分爲難亦何肯侈語更張而自取煩苦此又理之顯然自見者必謂逆料其難行而始毀我法以徇之恐非計之得者也統觀該給事中所奏既不悉疆臣之原電亦未諒臣部之苦心現在公廨新章因該署督與各領事尙未商定臣部既無直接交涉之權亦豈能有貿然改訂之舉所有該給事中聲請臣部改訂之處應毋庸議抑臣等更有請者公堂爲萬國觀瞻所繫既須謀對外之策亦宜先求治內之方如修監獄以資保衛開工廠以恤囚徒均爲該埠當務之急應仍請飭下兩江總督轉飭上海道查照前奏從速認真舉辦庶可免借禁之累兼可獲運籌之資似於時政刑章兩有神益得旨如所議行○己巳商部奏查鐵路之設必使枝幹相維而後商貨運輸可期增盛京城之西山產煤素富從前周口店石梯門頭溝三處煤廠林立專運西山南北所產灰煤該處商民大都恃此以爲生計近年以來迭據門頭溝商人先後稟稱自周口店接修京漢枝路通至琉璃河於是山南之煤南達保定正定北達京城天津運路因以日廣而門頭溝向運山北之煤以枝路未修

但恃駝運腳價既昂銷路又滯商相繼失業良醫不免流離莠民或從而滋事惟有由商人等招集股本接修門頭溝枝路並設立運煤公司專運山北灰煤俾蘇民困各等情臣等伏查門頭溝一帶接修枝路以興煤業自是應行籌辦之舉惟 畿疆要地若任該商人等集股自辦萬一股款略涉含混利害相權轉滋流弊是以該商人等所稟歷經 臣部批示此項枝路由 國家籌款接修以昭慎重等因在案上年四月間關內外鐵路大臣袁世凱等會奏以關內外鐵路所入餘利修造京張鐵路當蒙仰邀 俞允行知欽遵到部臣等以京張鐵路係用華款華工程師興築不假外人之手若將門頭溝枝路歸併京張路工一氣興修最為妥籌經與該管鐵路大臣等往返商酌並派員勘估計延長四十餘里需款約四十餘萬兩為數尚不過鉅而京西一隅商民藉可謀生地方即臻安謐洵係一舉兩得之計該管鐵路大臣意見亦均相同應請 旨飭下關內外鐵路大臣袁世凱等轉飭京張路工各員酌籌修展仍將勘估開辦各事宜隨時咨報 部備核以重要工得 旨如所議行○庚午政務處奏本年五月初二日准軍機處鈔交署兩廣總督岑春煊奏改添州縣分撥管轄一摺又要缺知府請改由外補一片奉 硃批該衙門議奏片併發欽此原奏內稱陽江濱臨洋面為海疆重鎮陽春恩平兩縣地處肇慶之南距府城各數百里陽江僅百數十里前撫臣蔣益澧等請隸陽江至為允當旋改旋復實非形勢之宜又廣州府之新



甯縣轄境五堡上新甯居縣之北地屬內河知縣駐之下新甯居縣之南地處濱海有廣海寨城爲縣丞  
建署之所商賈輻輳而盜賊滋多自上新甯至下新甯相去百里以外縣令鞭長莫及縣丞權力有限難  
期得力擬改陽江直隸縣爲直隸州將陽春恩平二縣屬於陽江並將新甯縣畫分爲二以上新甯爲一  
縣仍歸廣州府轄以下新甯爲廣海縣歸陽江直隸州轄裁新甯縣丞一員添設廣海縣知縣典史各一  
員新甯上川司鹽巡檢改歸廣海縣轄陽江廳教諭應卽裁汰訓導改爲學正並裁去陽江縣丞司獄兩  
缺改設直隸州州判吏目二員與原設之太平司海陵島司兩巡檢均歸該州管轄等語查建置之要實  
因時因地以制宜陽春恩平兩縣既距所管肇慶府治過遠加以土客雜居盜匪出沒稽查彈壓諸多不  
便自應改歸就近之陽江廳管轄以期呼應較靈易於控制原奏所請改陽江直隸同知爲直隸州知州  
以肇慶府屬之陽春恩平二縣撥歸管轄仍隸高雷陽道併裁該廳原有之役設教諭縣丞司獄三缺改  
原有訓導爲直隸州學正設直隸州州判吏目二員原設太平司海陵島司兩巡檢均歸管轄各節擬請  
均照准添改各缺應鑄關防條記俟奉 旨後請 飭下禮部鑄發至原奏擬將新甯縣轄境之上下新  
甯分爲兩縣以原有新甯仍沿舊轄分設廣海改隸陽江該署督亦係爲酌度時地起見惟該縣向隸廣  
州相安已久今驟議分歸兩屬一則仍隸首府一則隸他州而統轄道員如廣肇羅高雷陽又分兩道

於民情地勢恐有窒礙所請添設廣海縣知縣典史各一員並裁撤新寧原設縣丞之處應毋庸議其所請改設陽江直隸州知州歸外酌量升調揀補卽以正任同知田明曜補授現在訓導張鏡美移補該州學正裁缺之教諭鍾環瞻歸部選用裁缺之縣丞現未有人毋庸選補裁缺之司獄宋紹祁作爲裁缺卽用現設州判史目二缺仍請歸選陽春恩平二縣現任各員請悉仍舊各節吏部查原奏所稱均係爲因時制宜起見應准如所請俟 命下之日 臣部卽遵照分別辦理此外一切未盡事宜應統由該署督核明奏咨辦理又該署督另片奏稱廣東惠州府地當東江之衝非熟悉情形精明幹練之員難期得力斯缺定例請 旨簡放擬請變通辦理將該府改爲題調要缺嗣後遇有缺出由外擇其人地相宜者酌量升調揀補等語查惠州襟控海疆地方重要既據奏稱民俗强悍盜風素熾舉凡緝捕清鄉撫綏彈壓等事自非才具優長情形熟悉者恐未易措置裕如惟該府知府向係請 旨簡放之缺今昔既情形不同自應量爲變通擬請援照江西贛州府廣東潮州府各員缺成案嗣後遇有缺出應請 旨飭令該督於通省知府內揀員調補所遺員缺仍 簡員補授似此變通辦理庶於例章並無窒礙而該省亦收因地擇人之效於地方殊屬有裨得 旨如所議行○辛未諭周馥等電奏悉匪徒藉米賁爲名乘機搶奪著卽嚴拏懲辦以靖地方○戶部奏查淮鹽定章淮南則由場商運鹽儲於儀棧由儀棧發交運商運至行

銷省分再由督銷局換輪售與販戶淮北則由票販運鹽儲於西場以海分司主之而海分司不得私自下場捆鹽卽徐淮四食岸名爲官運亦向票販購鹽不令與市商直接官與商互相箝制所以爲杜私計而官售私鹽之案尙間有之今 盛京將軍趙爾巽奏派員督辦奉鹽就場徵稅將晒鹽運鹽銷鹽聯爲一氣皆由官爲主倘得人而理則如唐之劉晏固可成效昭著一有不當則上下相蒙欲興利而弊卽隨之茲事體大現在開辦伊始有治法尤貴有治人不得以該員所陳辦法極合機宜卽可毋庸隨時變遷應請 旨飭下該將軍認真講究嚴密考查總期有利無弊俾重鹽法而裕餉源得 旨如所議行○學部奏興學爲地方要政久已列入考成實與錢穀刑名並重查各省地方官員補署舉劾等向由藩司會同臬司具詳現既添設學司擬改爲藩學臬三司會同具詳庶地方人員各顧考成於興學育才不無裨益得 旨如所議行○壬申諭近有人奏現有會匪潛入蘇松一帶地方滋事該屬地方官隱匿不報著卽遴委委員前往嚴行查辦倘有以上情事應卽派兵趕緊剿捕○癸酉學部奏教育之道普及爲先中國疆域廣遠人民繁庶僅恃地方官吏策率督催以謀教育普及要乎其難之也勢必上下相維官紳相通藉紳之力以輔官之不足地方學務乃能發達現在學堂教育方見萌芽深明教育理法之人殆不數觀是非互相切磨互相研究不足盡勸導之責備顧問之選自科舉停止以來各省地方紳士熱心教

育開會研究者不乏其人章程不一窒礙實多有完善周密毫無流弊者亦有權限義務尙欠分明者臣部職司所寄亟須明定章程整齊而畫一之權限既明義務自盡似於振興教育不無裨益臣等公同商酌謹擬教育會章程十五條繕具清單恭呈 御覽俟奉 旨後卽由臣部通行各省一體遵照辦理其已經開辦者應令改照臣部章程以歸畫一得 旨如所議行○甲戌 上謂 奉先殿 壽皇殿行禮○趙爾巽奏奏省戰事初平在在待未靖又值開闢商埠現有營兵不敷分布擬再募練協巡隊下部知之○趙爾巽奏近年迭奉 諭旨令各省振興農工商業奴才伏思商以通有無工以精製造皆賴土地之生產力以爲之原料故欲整頓工商必先考求農業奏省地大物博曠土尤多人民習於故常不知講求地利奴才到任以後確知奉地宜農首於招墾放荒兩事實力舉行惟是農智未開亟宜示以新法各省勸農辦法大率不外設農學堂立試驗場兩端奴才以爲考究他種實業自宜以學堂爲先試驗爲附獨至農業似宜以試驗爲主學堂爲輔蓋農學深邃若紆迴於理化格致畢業不知何時且農多校少普徧爲難對鄉愚而談學理解者幾人誠不如試以淺近之實效自能爭相仿倣茲於省城東郊關治官地一區延聘日本農學博士爲場師招集近郊農民廣購各色籽種按土地之宜試行栽種已於本年四月開辦奴才因念奉省出產以梁豆爲大宗其餘講求尙少若不普加推廣逐事改良未免仍封

故步現復就試驗場附設學堂一所專養成農務之材即以該博士兼充教習學生定額百名限一年畢業學成之後即派赴各府州縣設立試驗分場以期全省農業一致此事爲秦省根本至計辦理得宜行之久遠將來出產豐富不獨可甲東南諸省即以應泰東西之商戰而有餘所有開辦之初一切選地建場置械購料以及聘場師設學堂並將來設立試驗分場所需用款應請作正開銷下部知之○趙爾巽奏前准商部咨以該部頭等顧問官翰林院修撰張謇呈請創設七省漁業總公司先於浙江購備漁輪試辦以保海權而擴實業行令奉省酌核統籌等因准此查秦省扼黃渤之咽喉西南起於綏平縣東達旅順大連北折而訖於安東鴨綠江口海岸袤延千有餘里其流域較之江浙爲長水產素號富饒魚類亦極繁賾惟地近北帶入冬以後汶港封凍網罟俱停組織調查均屬無從措手本年春冰甫泮當即趕飭派委專員前往蓋平海城營口熊岳一帶設法籌辦當此漁學未講漁政未興驟語高深難期領略而客軍在境匪跡復出沒無常沿海居民去城較遠風鶴驚恐失業堪虞仙此時機自以保護爲入手之要著應即飭令雇備小輪二隻配裝快礮募集水勇數十名瀕海海岸復酌陸軍以資聯絡示諭各漁戶保其營業三四月間蓋平之鯪魚圍地方向有黃花魚汛卽於此地先行其保安政策駐兵未及一月海陸均極妥貼得魚較往年爲盛漁船戶極爲歡慰爰卽令其聯絡一氣發給旗幟編入號籍凡屬漁業均

一律註冊作為公司之分股現已將次開集業經刊發關防委員設局標明奉旨漁業公司仍當飭令調查水產改良漁業覓購海輪以期逐漸舉行並俟七省漁業總公司成立之後定有通章再當查照遵辦奉省頻年兵燹實業彫殘強立基礎事倍功半未可以內地相衡惟有隨時妥籌以期廣充而臻完備又奏准商部咨以漁業公司應附設水產學校擬於沿江十一省合籌銀十萬兩仍就吳淞建設令即設法籌議去後茲據擬奉省瀕海一帶水產繁多祇以平時不知請求難免利權外溢現在漁業公司既設學校奉省雖時艱欸絀亦應竭力籌維擬於開辦經費內撥銀一萬兩匯交備用一俟該學開辦即由奉選派學生送往肄業所籌經費應請作正開銷等情前來奴才覆查無異理合陳明下商部知之○袁世凱奏銅圓餘利短絀支欸無著擬另籌撥補付 旨允行○戶部商部擬奏議准粵督岑春煊奏就地籌款興辦鐵路得 旨允行○予故江南提督楊金龍優卹建祠戰功政蹟交國史館立傳○乙亥崇善張曾敬奏等查明南田情形妥議經理之法業經會同專摺奏陳在案惟查核原呈其言雖欲經理南田而意實注重於經理三門蓋以三門灣曾經外人要索故議於此自設軍港免再為人租借此其所慮甚遠而其關繫亦極重大是以臣等於咨照浙江提督呂本元往查並派專員履勘外復經函商現統南北洋海軍廣東提督薩鎮冰親往巡視茲據先後聲覆前來臣等細加查核所謂三門灣者如專指上下

三門言則其處水勢過潮漲時或深至十丈及二十丈不等風濤極爲險惡若遇東南風作輪船亦難寄  
碇此斷難爲軍港者也若就西人所指之三門言則又形勢散漫口門衆多乏要可扼防不勝防既無屏  
蔽之山可以避風又無廣大之塢足以造船此亦不足爲軍港者也從前意國曾議租借旋即停罷其地  
已爲外人所不顧卽亦無事經營茲查得南田之北定海之南中有象山港深入象山境內六十六里口  
寬十二里水深自二十一尺至一百十五尺不等羣山環遶隨處可以避風港內向南別有支港曰西湖  
港其口曰鵝鴿嘴關鎖甚緊地勢平圓可作船塢由西湖港至象山縣城不過十五里陸路西達奉化北  
達寧波均在數十里內聲勢聯絡作爲海軍根據之地最爲合宜或以口門較闊引爲缺點不知口闊則  
敵船易入口狹則我船難出敵船易入猶得以港內之駐艦禦之我船一出則直自封而已近人考查旅  
順有謂不適宜於軍港之用正以口門過狹不能同時二船并出設收口之後敵人於口外駐師伺擊港  
內雖百師船而與敵交綏者實祇有一船之用此又不得不爲之熟籌而審處之者也查光緒二十五年  
意國兵艦去三門灣後卽改泊象山港時來時去將及兩年棄彼就此必非無因近來各國兵艦亦多主  
港中游弋若不早爲之計而待其啟口深恐因應爲難臣等以該港北控定海南望南田勢成犄角港口  
大橫山橫塞其衝亦足稍資屏蔽薩鎮冰習於海者也曾至港中勘驗以書抵臣曾數盛稱其口勢紆長

衆山環峙至謂曩者威海旅順港澳顯露故敵敵可搗中堅不若衆山港深藏可守云云夫地形之便利如此而外人之窺伺若彼縱不能即日經營亦豈可不預謀曲突况各西報咸言英人陽歸威海陰覬丹山雖未足遽信然外人之竊取本亦無常臣等以爲目前之計莫若聲言衆山港自作軍港而以定海南出爲犄角使外人知其地爲我所注意庶幾雄心少戢而折衝收效於無形臣等揆度時勢爲先事預防起見是否有當懇 恩一併飭下政務處核議如果 臣言不謬即懇 明旨宣示聲明衆山港作爲將來海軍根據之地以期預杜覬覦下政務處議奏○丁丑周馥等電致軍機處前因雨水過多江南江北米價日增經馥等酌擬凡在蘇省界內販運及外省之米運入蘇省境內者酌免本省米釐一月聲明限滿再行察看情形酌辦至米稅仍照常徵收其外省來蘇購米者非奏明有案釐稅一概不免電請代奏嗣於五月十二日准鈞處電傳奉 旨著照所請戶部知道欽此欽遵通行遵辦並將麥粟等糧堪以充餉者亦一律免釐一月以示體恤一面撥款平糶招商販運廣爲接濟現在一月限滿雖天時暢晴人心稍定而新穀未登來源尙少米價仍未減落察看情形本年節令雖早新穀須七月初旬以後陸續登場覲等往復電商擬請將免釐之限展至六月底爲止同麥粟等糧一概照免至七月初一以後再 酌量徵收查蘇省釐捐向以米爲大宗今免釐一月有餘餉需大絀然民命攸關不得不爲損上益下之舉仰懇



天恩照准除先開姓名外順釐卡外乞代奏得 旨屆時等因奏請將米悉免蠲展限至六月底等語  
戶部知道○戊寅賞色楞額續假一月○調劉永亨爲倉場侍郎○己卯諭福建布政使周建開缺○  
以吳重熹爲江西巡撫增韞爲福建布政使王清穆爲直隸按察使○庚辰調張仁黼爲工部右侍郎轉  
殿修爲學部左侍郎以達壽爲學部右侍郎○辛巳諭綽哈布錫良奏官軍攻克臺塘喇嘛披逆番請將  
出力員弁擇尤獎勵一摺臺塘所屬桑披地方逆番中乍娃等肆亂稔惡日久稽誅去年討罪已塘仍  
復甘心助亂屢有搗村劫弁等事實屬兇頑已極經道員趙爾豐等相機進剿掃穴殲渠辦理尙爲得法  
在事各員升跋涉窮荒苦戰數月不無微勞足錄允宜特沛恩施分省試用縣丞吳俱著免補縣丞以知  
縣分省補用並賞加五品銜戴藍翎府經歷銜傅肅林張剛均著以府經歷歸部選用並賞給五品頂  
戴縣丞銜華承禧楊世銜均著以縣丞歸部選用並賞給五品頂戴已革花翎四品頂戴貴州貴定縣知  
縣王會同著開復原官銜翎仍歸原省補用並免繳捐復銀兩千總許志霖著免補守備以都司儘先補  
用並賞戴花翎把總張榮魁著免補千總以守備儘先補用並賞戴花翎守備銜謝安邦著以守備儘先  
補用並賞戴花翎外委丁恩榮五品軍功程鳳翔孫寅璋程汝儒羅銘忠羅銘宣均著免補把總以千總  
儘先補用並賞戴藍翎四川建昌道趙爾豐將兵轉戰尙合機宜雖據聲稱不敢仰邀議敘究未便沒其

成勞趙爾豐著賞給武勇巴圖魯名號另片奏已革廣西補用道錢錫寶隨同趙爾豐進討勦勞迭著洵  
屬異常出力懇請逾格施恩等語錢錫寶著開復原官翎枝餘著照所議辦理所有善後事宜仍著該將  
軍等督飭各員妥為籌辦隨時奏聞○壬午以趙秉鈞為巡警部右侍郎○乙酉有奏奏廟爾喀貢使定  
期本年六月初一日自陽布城起程取道噶拉木行走報聞○商部奏據湖南總商會眾董陳文璋周聲  
洋陳家珍等聯名二十六人呈稱粵漢鐵路自美約廢棄收回路權歸湘粵鄂三省分辦粵省紳商合力  
鄂山官局湊資聞皆次第訂議刻期興辦惟湘僅恃米捐鹽釐入款有限以致開辦無期商董等為湘商  
代表不容遲疑觀望然路長費鉅自以籌款為先爰於四月間提議商承辦擬集股款二千萬元設立  
商辦湖南全省鐵路有限公司由發起諸人公同認股二百萬元以為辦路基礎當時與議者千餘人眾  
口贊成歡聲雷動良以正名商辦則障礙全消人無疑慮此湘境鐵路經商董等提議湘商踴躍之實在  
情形也惟造端宏大非有全省紳商所信服者不足以廣茲鉅任查有順天府府尹袁樹勛廉明公正眾  
望素孚擬公舉為鐵路總理統籌全局必能措置裕如又前江西按察使余肇康才識兼優熱心時政在  
籍候選道張祖彭才長心細洞悉商情於鐵路亦曾研究擬公懇酌定派為協理俾得共襄厥事查安徽  
江蘇浙江等省均邀奏明商辦而派大員主持先後奉 旨允准在案湘省事同一律擬援案請歸商辦

以維路政而順商情其勘路定綫購地興工用人理財各事宜恭候奏定總協理公同妥訂詳細章程再行呈部核奪等語臣等伏查粵漢路綫爲湘粵鄂三省命脈所關湖廣督臣張之洞老成勝算體國公忠俯順三省之輿情堅持廢約卒能收回自辦現在粵境既商籌商辦集股頗稱踴躍業經兩廣督臣岑春煊奏奉 俞允在案湘路自應迅速興辦以期銜接既據該商董等請歸商辦公舉總協理懇乞代奏前來臣等未敢擅於上聞謹恭摺具陳得 旨湘路著官督商辦所舉總協理著張之洞查明辦理○丁亥以承祐爲內閣學士○袁世凱奏萬全縣署請移置張家口下部駁奏○戊子戶部奏滇省錢糧減成早經限滿仍未照額徵收請 旨飭令自光緒三十一年奏銷起嚴核分數切實清釐以重正供而符定制得 旨如所議行○癸酉外務部戶部奏光緒三十二年三月十九日准軍機處鈔交署兩江總督周馥等奏通州天生港自開商埠一片本日奉 硃批外務部戶部議奏欽此欽遵到部查原奏內稱通州天生港自開商埠曾於光緒二十五年欽奉 諭旨著切實查明籌度具奏經前督臣劉坤一遵 旨籌度情形奏請開辦聲明俟商務漸興再行設立鎮關分卡徵稅籌款以辦埠工奏奉 硃批該衙門知道欽此欽遵在案比年以來因商務未臻大盛一切開闢築步在在需款以致延未舉辦近因海州自開商埠據通州在籍紳士翰林院修撰張謇函請將通州一埠一律舉辦當以通州天生港前既奏明自開商埠

有案自應速籌舉辦惟該處係在江海鈔關轄境前請歸鎮關設卡與例未符經飭江海鎮江兩關道會商稅務司派員會勘茲據該關道等會同詳稱天生港設立分關按照定例應由滬設關派員經理並據查明上年出口分銷各處貨物共估價洋二百七十八萬六百餘圓內地經過分口稅釐共銀一萬一千七百八十餘兩此外來往各貨及該州唐家關各廠歲出之貨爲數尤鉅若自開口岸商務可立見繁興該道等現與稅司商酌擬另訂專章暫作可以起下貨物之不通商口岸惟開辦之初需款甚鉅官既難籌商船亦屬不易查通州大連輪步公司現備有躉船兩號擬令該公司就此接造碼頭浮步其江岸應行修築之處並由該公司自行量力分年興辦所用款項暫歸商人恩借俟工竣後卽於該處每年官收進出稅項照數撥還似此分任尙屬輕而易舉等情詳加察核所議尙屬周妥仍飭江海關道會同稅務司另訂專章詳奏並分咨外務部戶部查照等語外務部查光緒二十五年前督臣劉坤一具奏籌度天生港開埠情形一摺據稱天生港本非商賈輻輳之區雖設有紗廠尙未成市開埠未能大有裨益惟長江一帶該港形勢扼要一俟商務漸興再於此處設立分卡等情今該署督等奏請另訂專章暫作可以起下貨物之不通商口岸係爲自保權利起見惟既開埠而仍不通商爲向所未有之辦法究竟利弊若何必須預爲揆度經外務部電達該署督查核去後准覆稱暫作可以起下貨物之不通商口岸係按照

大通大處辦法開房開棧暫可不建費用較省三五年後酌度商務情形即行設關開埠此時利在省費亦不致有弊請酌核等因查光緒二年中英所訂煙臺條約第三端內載沿江安徽之大通安慶江西之湖口湖廣之武穴陸溪口沙市等處均係內地處所並非通商口岸今議通融辦法輪船准暫停泊上下客商貨物等語天生港亦係沿江地方與大通大處形勢略同自可准華洋各輪來往停泊上下客貨惟該處東距江海關西距鎮江關均相離不遠若開作通商口岸其關稅一項恐致此盈彼絀徒增設關之經費於稅務仍無裨益於地方則轉多一交涉之機關所有天生港一處應祇作為起下貨物之口岸以通航路而興商務不必預籌開埠通商俾免洋商租地之糾葛庶於自保權利之意尤為切當其所設分關應即作為江海鈔關之分卡仍俟訂定專章送部核准再行開辦至接造碼頭修築江岸等項工程係屬各商埠應辦之事無論通商與否均應因地建置以期便利商民原奏所擬暫由大通輪步公司恩借款項自行興辦工竣後於該處官收稅項撥還一節經外務部以該公司係何處商人所設附近碼頭江岸有無官地此項工程需款銀借恩約若干現歸該公司自辦將來有無壟斷之弊電查該署督去後准覆稱大通輪步公司係通州在籍翰林院修撰張謇等集股附近碼頭江岸並無官地建關築埠所需地畝應照原值劃撥歸官官認地值至開埠兩項工程經委員勘估約需銀十萬兩借恩按通州商市周年

八釐係因官款支絀由商借墊興辦絕無壟斷之弊等語戶部查各關開埠之初大半取借官款先爲墊助俟本關收有稅項陸續歸還上年江蘇海州開埠係紳商自行恩借銀兩經外務部會同戶部議准有案此次天生港作爲起下貨物之口岸恩借大遠輪步公司款項以爲設關築步之用其情事與海州略同應准照辦惟該公司承貸此項銀款如須另集股款應專招華股以杜流弊將來由官認還本息亦應按期支付毋令商人受虧至地方公事以及開設口岸一切應辦事宜仍應由江海關道一手經理該公司不得干預其訂立借款合同等件並飭先行報部立案以備查考得旨如所議行○己丑以楊士琦爲商部右丞轉熙彥爲商部左參議以耆齡爲商部右參議○庚寅周馥奏上海通商日久實爲華洋輻輳之區光緒二十一年經前督督臣張之洞奏准開築南市馬路闢成華界商民稱便惟地限一隅不敷展布二十九年八月間准外務部咨議擬商約大臣呂海寰條奏要務摺內聲明上海已於租界外另設華界應否再行擴充應由南洋大臣酌核籌辦等因經前督督臣魏光燾飭上海道妥議稟辦旋據粵商陳紹昌等創議籌款稟准於新聞瀕北地方建橋築路作爲北市商場後因經費無著僅造成洋式浮橋一座而止現該商等欲以財力不逮請援照南市成例改歸官辦查商埠本應由商捐辦但此時馬路未築市廛未立無從收捐不得不藉官力提倡且從前南市關界卽係撥用官款是北市亦應照辦約計開辦

伊始一切購地築路建屋設捕事宜需銀二十餘萬兩查二十三年淞滬鐵路圈留吳淞官地本擬在滬歸併收回款內撥還價銀嗣准前督辦鐵路大臣盛宣懷來咨請將吳淞蘆漢濱北圈留未用官地五十一畝零繳還歸官又鐵路購存未用民地三十八畝零一併歸官抵補是此項地畝自應由官收回迅速分別召變所得地價卽充作北市開闢商場經費以公濟公據上海道稟統計此項地價可變銀二千三四萬兩惟蘆漢濱北官地正扼吳淞口門請留爲公家建造碼頭廠棧停輪之用無庸變價其餘民地卽行設法召變已飭該道照辦以外灘地凡被民間侵佔冒領及應歸官變價之產均由上海道派員會縣清查酌收價值給照營業並將此項貼補北市修造馬路之費卽以商民之款辦便商便民之事洵屬一舉兩得將來辦有成效可與南市聯合一氣市面既廣商務自興挽回利權良非淺鮮下部知之○辛卯 萬壽聖節 上詣 樂壽堂行禮御仁壽殿受賀○癸巳 上詣 大高殿 壽皇殿行禮○上恭迎 慈禧端佑康頤昭豫莊誠壽恭欽獻崇熙皇太后還海○乙未予四川南光縣壽民李會揚廣東開平縣壽民關定陸關仁和番禺縣壽婦凌林氏福建閩縣壽民施嘉言江西上猶縣壽婦吳王氏分宜縣壽民林光順旌表○是月日本國新簡駐華使臣林權助抵任

臣朱壽朋敬編

臣汪錫增恭校

秋七月丙申朔時享 太廟 上親詣行禮○丁酉 上御乾清宮日本國使臣林權助親見呈遞國書

○戊戌賞胡燏棻續假一月○以松壽爲鑲藍旗蒙古都統勝恩爲福州副都統○壬寅諭軍機大臣等  
考查政治大臣回京條陳各摺件著派醇親王載灃軍機大臣政務處大學士暨北洋大臣袁世凱  
公同閱看請旨辦理○趙爾巽奏奉省荒地日闕交涉日繁相距較遠之有司未能顧及自非畫疆分界  
添設專官無以嚴責成而資治理 奴才自上年抵任卽懷遵毋拘成例之 諭旨於地方應辦各事留心  
體察委員查勘邇來互證參觀得其梗概有亟應變通設治之所數處謹爲 聖主陳之一爲法庫門係  
開原縣屬境距縣一百一十里東北則通吉林正北則鄰蒙部人煙輻輳行旅絡繹轉瞬商埠一開華洋  
錯處交涉繁難均須隨機立應原設知縣有鞭長莫及之虞應於該處添設撫民同知一員名曰法庫門  
撫民同知兼開原及附近康平鐵嶺三界地方併臨營轄以資控馭而一事權一爲同江口係昌圖府屬  
境距府七十里扼昌開之要害據遼河之上游水陸交衝五方雜處爲北路商務總匯之區亦議闢爲商



準地方沿河向多馬賊狙伺劫掠在在堪虞保護巡緝責重事繁斷非原設知府所能兼顧應添設河防同知一員名曰同江驪河防同知專司交涉緝捕庶幾有所責成無虞疏懈一爲江家屯係錦州屬境距縣九十五里毗連直隸彰陽府境沿邊要隘向爲盜匪出沒之區恃與縣城遠隔此拿彼竄習爲逋逃附近商民多被其害亟應於該處設官得以鎮懾彈壓銷患無形擬添設撫民通判一員名曰江家屯撫民通判青錦縣通西各村莊併歸管轄庶於綏邊固圉之道胥得其宜一爲阿司牛泉鎮係遼陽州屬境距州一百三十里地居遼河之中與新民府接壤犬牙相錯附近各處均距治所較遠爲教化所不及以致民情頑梗盜匪潛蹤良善商民多被擾害是宜添設知縣一員名曰遼中縣帶新民遼陽海城三處地段併歸管轄平時則宣布政教有事則嚴緝匪徒庶地方穩又安之效一爲小三家子係鎮安縣屬境距縣九十里地居邊徼控制難周擬添設分防縣丞一員責令巡緝匪類以佐縣令之不逮一爲水門子係復州屬境距州一百二十里中隔鐵道重山複嶺亦易藏奸擬添設分防巡檢一員專司緝捕事宜以輔州牧之不逮以上數處均均已先後委員發給經費刊刻木質鈴記前往試辦誠以新政如學堂巡警衛生諸事固非有專員提倡勸導鄉民未易信從卽不日開埠設立鄉官亦非有專員就近區畫督飭無以規久遠而冀成功相應奏明請 旨先行敕部立案一俟該員等試辦就緒應爲何項要缺暨將來有無

變通再當奏請 敕部分別鑄給關防印信鈐記轉發領用俾昭信守其未盡事宜及此外如有應行設  
治之處容再體察情形續行奏咨辦理得 旨如所請行○甲辰鑲藍旗蒙古都統連順卒卹陞如例○  
以永明爲陝西延綏鎮總兵○諭軍機大臣等宗人府奏本屆恭修玉牒是否仍照奏定報効成案抑或  
由部撥款一摺著由戶部撥款核實辦理○乙巳袁世凱奏硝片現設公司私販奸民竄成鹽巡查緝按  
例治罪通飭文安等十六州縣並行知該公司遵照在案惟是私硝雖干例禁內僅有私煎私販應治之  
罪而無硝鹽殺傷捕人作何治罪明文亟應酌定科條以資行用飭據該公司查明硝匪販運有一二人  
者亦有三五成羣聚聚十人以上帶有鎗械用大車騾驢裝載販運者核其情形與鹽匪販賣私鹽相類  
查硝斤爲製造軍火所必需若不覆爲查緝慮其接濟匪人關繫尤重擬請嗣後匪徒私販硝斤如有殺  
傷捕人均照鹽匪拒捕殺傷之例辦理其鹽巡殺傷硝匪應否照擅殺及凡關殺仍以是否詳司報院有  
名爲斷至未經拒捕之硝匪例有治罪專條應仍照舊辦理毋庸另議下部知之○丙午政務處奏六月  
初十日准軍機處鈔交兼署閩浙總督崇善等奏密陳象山港形勢足爲軍港一摺奉 硃批政務處議  
奏欽此查現在時局日艱海疆日重欲謀自強之用非振興海軍無以外固洋面內衛各省而創建海軍  
所最急者尤在勘度完全足恃之軍港該督等所奏象山港一處近來論列海軍者亦多稱爲中國軍港

上選原奏於該港入境之道里口寬水深之丈尺避風之山作塢之地均已查明確瞭如指掌洵稱軍港合宜之地所請象山港可爲軍港之處自屬可行惟創設軍港規模宏大事體繁重擬請 飭下練兵處商同南北洋大臣派員詳細勘度具奏再爲經營布置以重戎備而固海疆得 旨如所議行○丁未

上詣建福宮行禮○遼頤和圖○戊申諭朕欽奉 慈禧端佑康頤昭豫莊誠壽恭欽獻崇熙皇太后

懿旨我朝自開國以來 列聖相承謨烈昭垂無不因時損益著爲憲典現在各國交通政治法度皆有彼此相因之勢而我國政令積久相仍日處貽危受患迫切非廣求智識更訂法制上無以承 祖宗締造之心下無以慰臣庶平治之望是以前簡派大臣分赴各國攷查政治現載澤等回國陳奏深以國勢不振實由於上下相睽內外隔閡官不知所以保民民不知所以衛國而各國之所以富強者實由於實行憲法取決公論軍民一體呼吸相通博採衆長明定政體以及籌備財政經畫政務無不公之於衆庶又在各國相師變通盡利政通民和有由來矣時處今日惟有及時詳晰甄核仿行憲政大權統於朝廷庶政公諸輿論以立國家萬年有道之基但目前規制未備民智未開若操切從事徒飾空文何以對國民而昭大信故廓清積弊明定責成必從官制入手亟應先將官制分別議定次第更張並將各項法律詳慎釐訂而又廣興教育清釐財政整頓武備普設巡警使紳民明悉國政以預備立憲基礎著內外

臣工力求成效俟數年後規模粗具查情形參用各國成法妥議立憲實行期限再行宣布天下禍進步之遲速定期限之遠近著各省將軍督撫臚論士庶人等發憤爲學各明忠君愛國之義合羣進化之理勿以私見害公益勿以小忿敗大謀尊秩序保守和平以預儲立憲國民之資格有厚望焉將此通諭知之○周馥奏上海爲通商要口衝繁甲於他省他埠中外商人之懋遷於此者紛至沓來難以數計近年生意日盛旅居尤倍於前惟是人數既繁匪類因而潛跡租界以內雖由工部局設立巡警自爲保衛而租界以外之華商則一無戒備上年據前升道袁樹勛請將向駐之滬軍親兵改爲巡警分派城廂內外站街巡警以資保衛詳經奏明在案乃地廣兵少顧此失彼疏漏尚多況上海從前本駐有原標奇兵撫標滬軍滬軍親兵忠字信字等營總計兵多之時約有二千二百餘人嗣經陸續歸併裁撤現在分防城外及各鄉鎮者僅有撫標滬軍五百名奇兵營所改之巡防步兵四隊計兵夫五百六十名不及從前兵數之半設遇有事不敷調撥緩急實未可恃若不將從前未經設巡之處一律補辦齊全實無以保治安而慰中外商民之望現擬再行添設巡警五百名其營制餉章照南北洋巡警章程辦理查原有駐滬軍親兵現已改爲巡警者每年約支關稅銀一萬一千餘兩有闕之年約支銀一萬二千餘兩又現存之撫標滬軍每年約支銀二萬七千餘兩有闕之年約支銀二萬九千餘兩向在關稅項下

作正開支已按結入冊造報此次再添五百人約計每年應需銅銀二萬數千兩請仍照前案在關稅內  
動支彙報將來如仍不敷分布再由官紳商民另行設法籌解非萬不得已不敢再動支稅款據該關道  
瑞澂詳請奏明立案前來臣查租界外商務日盛人家地遠僅添此數百名巡兵實屬萬不可少之舉惟  
此項銅銀除關稅外無他款可籌事關保護地方商民治安所繫需費無多獲益甚大似應照准辦理下  
部議奏○己酉調端方爲兩江總督兼南洋大臣以周馥爲閩浙總督楊士驤爲山東巡撫○諭昨日有  
旨宣示急爲立憲之預備飭令先行更定官制事關重要必當酌古準今上稽本朝法度之精旁參列邦  
規制之善折衷至當纖悉無遺庶幾推行盡利著派載澤世續那桐榮慶載振奎俊鐵良張百熙戴鴻慈  
傅製誦徐世昌陸潤庠壽耆袁世凱公同編纂該大臣等共矢公忠屏除成見悉心妥訂並著端方張之  
洞升允錫良周馥岑春煊選派司道大員來京隨同參議並著派慶親王奕劻孫家鼐鴻鵠總司核定  
候旨遵行以昭鄭重○庚戌 上諭 奉先殿 壽皇殿行禮○退頤和園○諭御前大臣禮親王世鐸  
於出入恩從並不跟隨殊屬非是著開去御前大臣差使奉恩鎮國公載澤加恩著在御前大臣上學習  
行走○調增韞爲直隸布政使以連甲爲福建布政使○辛亥以朱益藩爲山東提學使○調龐鴻書爲  
貴州巡撫以岑春煊爲湖南巡撫○壬子 上諭 奉先殿 壽皇殿行禮○退頤和園○商部奏 臣部

於光緒三十二年六月間接據廣西官紳內閣待讀陸嘉晉內閣候補待讀梁瀛等聯名六十八人呈稱竊維鐵路保護利權關係重要近年風氣漸開如皖贛川粵蘇浙等省皆由本省紳商合力籌辦均邀奏奉諭旨允准在案廣西地處邊陲運輸不便非建築鐵路商務斷無起色現經京外官紳屢次集議大概辦法擬先集股欸一千萬元設立廣西全省有限公司先由本省紳商籌備正底股百萬元為創辦之用路未告成以前之股患暫就地方情形酌量籌補其路線大概由桂林上至金州以達於湘下至梧州以達於粵為一段於梧州至南寧為一段由南寧至龍州為一段三段路線擇緊要一段首先開築其餘枝路各綫陸續測勘次第興辦惟責任重大繁難非整頓籌備及家道殷實足以聯合紳商之人不克膺此鉅任查有廣西提學司于式枚學識宏通才猷練達夙昔究心時務於鐵路各項辦法均能得其要領且近在廣西易於兼顧一切路事用兩電商推控制可期得力擬公舉為總理候補四品京堂左宗蕃商務熟習辦事勤能素為商民所信服擬公舉為協理以之主持公司事宜必能裨益路政措辦裕如並准工部左侍郎唐景崇兩稱呈中所述各節均係景崇與京外官紳函電籌商意見相同此事為粵西路政所關即國家利權所繫容懷桑梓切念時艱雖未列名簡端亦迫於同里之義務應請援照各省成案據情奏明立案等語臣等深維路政關係重要既據該省官紳呈請代奏前來未便覆於上聞謹恭摺

代陳得 旨如所議行○癸丑命楊士琦爲會辦電政大臣○以梁鼎芬爲湖北按察使○調景厚爲禮部右侍郎以壽勳爲兵部左侍郎○甲寅子故甯夏鎮總兵牛師韓優卹並於原籍湖南賜卹建廟將戰功政蹟交國史館立傳○財政處戶部奏光緒三十二年六月十九日准軍機處鈔交兩廣總督岑春煊奏廣東省改造一文銅錢謹陳造辦情形一摺奉 硃批財政處戶部議奏欽此查原奏內稱廣東所造銅元流行頗廣迨上年九月奉文禁運出口銷路頓滯而錢局購存紫銅尙多積欠銅價甚鉅自非變通改造不可因思一文制錢僻處固屬信服繁區亦仍通行徒以舊式成本太重官家受虧過甚無力鼓鑄而私鑄銷燬之弊亦因之叢生今酌量於輕重印字之間擬造一文制錢用紫銅大成鎔配白鉛四成每文重三分二釐正面印光緒通寶四字背面印清文廣寶二字中鑿圓孔以便貫串較諸舊式具體而微輪廓字畫均令精緻工作既精則不易私造體質非重則可免銷燬仍舊以干文爲一串定價銀七錢三分與舊有制錢一體准完錢糧關稅暨一切官款出入一律造成發行市面商民均稱便利現在每日可造三百數十串合計銅鉛工作略有虧耗將來造數日多自可顧全成本雖無餘利可冒而便民惠工存銅欠價亦皆有所歸著於局務市面洵屬兩有裨益等語臣等伏查中國幣制未定向惟生銀與制錢通用最廣而民間貿易來往尤多利用制錢近年各省制錢缺乏始議鑄造銅元以救錢荒惟銅元定價

原與舊幣懸殊故操縱失宜卽不免弊端自出臣等前因各省銅元鑄數日多致紊圖法奏請酌定限制並禁運出口期以消息盈虛稍劑其平今廣東省銅元減鑄購銅欠價甚多奏請改鑄一文銅錢便民用而顧銅本所稱繁盛之區利用銅元亦仍通用制錢其偏僻地方民間仍多用制錢擬酌量輕重印字之間以杜私造銷燬之弊各等語所陳均不爲無見查審定幣制補助貨品亦關緊要一文銅錢習用最廣如果鑄造得宜定價與實價無甚懸異自無不推行盡利弊少益多既據聲稱造成發行商民均稱便利並據該督將新造制錢式樣咨送臣等臣等詳加審察分量質色配造尙均適宜應卽准予試辦現當整頓圖法之時鑄造事宜各省務歸一律現在廣東省添造一文制錢各省自均可仿辦查臣等前請整頓各省銅元奏明概由戶部頒發祖模今若改鑄制錢由臣等部飭令造幣總局按照廣東省所擬辦法審定分量成色製造祖模輪廓字畫鐫刻精細並分識省分加入一文字樣頒發鑄造銅幣分廠酌量添造作爲補助貨幣其發售價值應按照新造庫平一兩銀幣合制錢一千四百文一律合算不准私爲增減造成之後應照舊有制錢一律流通毫無歧異錢糧關稅等項官款均准交納以利推行得旨如所議行○戊午以岑春煊爲雲貴總督調周馥爲兩廣總督丁振鐸爲閩浙總督○庚申上諭壽皇殿行禮○暹頤和圖○趙啟霖奏內外要政宜分別列表逐年刊布俾全國便於研究以爲



議院基礎下考察政治館知之○命那桐爲崇文門正監督統朗爲崇文門副監督○辛酉以寶熙爲鑲白旗漢軍副都統○壬戌以孚琦爲正白旗漢軍副都統○商部奏上年七月十七日學務處會同臣部戶部具奏議覆御史王金鎔奏請添設藝徒及初等中等工業學堂並請徵撥經費一摺奉 旨著由崇文門溢徵稅項撥給三成欽此查原奏內聲明應辦事宜擬辦高等實業學堂由監督臣部左丞紹英妥議章程次第籌辦當即遵飭該員酌擬辦法旋據聲稱藝徒學堂應作爲初等工業學堂附設高等實業學堂內辦理應在該學堂左近建築工場考取藝徒聘訂技師分科教授其中等工業學堂擬由各處高等小學堂考取考驗合格學生卽行開辦所有各該學堂章程尙須詳細擬訂等語復經臣等於上年七月二十六日奏明奉 旨允准在案查此項學堂皆係注重工業以教育貧民子弟造就良善工匠爲宗旨既蒙 特頒帑項俾資次第擴充自應妥籌興辦現在修築校舍規畫一切將次就緒據左丞紹英先行酌擬藝徒學堂簡明試辦章程十五條呈請核示前來臣等查閱所擬辦法如暫招藝徒三百人分爲速成完全兩科速成科注重實習畢業期限由半年至二年爲度完全科學理與實習並重畢業由三年至四年爲度又教授課目亦分通修專修兩科通修科分修身算法博物理化歷史國畫體操國文唱歌習字十門專修科分金工木工漆工染織繅業文具六門分別速成完全兩科酌定肄習課目他如教員

管理各項規則均係遵照奏定學堂章程並參考日本工業學校規則酌訂當經咨行學部核覆嗣准覆

稱所訂簡章學科程度大致周妥可即試辦等因當經臣等轉飭該左丞遵照辦理務求實效以仰副

朝廷振興工業嘉惠編氓之至意得 旨如所議行○甲子 上奉 慈禧端佑康頤昭豫莊誠壽恭欽

獻崇熙皇太后還海○陳兆文病請辭任允之○諭周馥陳夔龍電奏該省徐海淮安等屬水災情形深

堪憫卹卹從帑銀十萬兩由藩庫給之妥爲賑撫毋任流離失所至所請災區錢糧分別減緩及請截留

漕糧之處著俟秋後確查情形再行奏明請旨○財政處戶部奏臣等前因各省銅元局廠日增鑄造愈

多錢價日賤官民交困當經酌定限制鑄數奏准通行在案自限制後銀價幸未大漲惟是現在鑄造銅

幣多至十六省一省或至二三局限制之數各省雖多遵照然江蘇已因逾限鑄造經臣等奏停而各省

之請免限制者亦復不少若不急行整頓恐多鑄爭銷之弊仍難盡免且鑄數雖有限制而局用不能大

減反致機力餘閒復多坐耗亦屬非計前署兩江督臣周馥因限制後餘利無著尙須賠貼局用業電請

將寶廠暫停卽其明證臣等再四籌維惟有將現有局廠酌量歸併庶可救近日之弊冀收後來之效前

將此意電商鑄幣各省撫臣現均陸續電覆直隸督臣袁世凱主定審一價值湖廣督臣張之洞主續歸

併前署兩廣督臣周馥前署兩廣督臣岑春煊則請臣處臣部主持其事其餘各省或請定銀銅價值或

請增鑄銀幣或請鑄當五以下銅幣或請禁各省爭鑄其不願歸併者大抵以餘利爲籌款恐一經歸併則本省之利盡失因此多懷觀望惟廣西撫臣林紹年謂圖法重在便民取足民用而止官民收發公其出入數語較爲扼要今欲統籌兼顧誠非由臣處臣部居中主持不可然中國幅輿遼闊若如各國僅設中央一廠轉運恐形不便惟有相度地勢之毗隔察核市場之廣狹比較民間需用之多寡規合全局量爲歸併除臣部所設總廠外擬以山東歸併直隸爲一廠湖南歸併湖北爲一廠江西安徽江蘇清江爲一廠浙江歸併福建爲一廠廣西歸併廣東爲一廠合奉天河南四川雲南四廠共九處皆歸臣處臣部統轄調劑盈虛彼此勻撥嗣後體察情形再行酌量減併其各省承辦之員果其辦事妥善即可會同督撫加札委用並由臣部遴員會辦以資歷練隨時調查需用情形核定各該廠應鑄數目飭令辦事之員如數承造通定畫一價值撥往各處銷售內地州縣未經通行銅幣者尙多主持之責雖在臣等而行銷之事則尤在各省地方官之推行盡利應請旨責成各省將軍督撫飭令各該地方官按照臣等所奏章程切實推行官民一律不准挑剔折減至各省原存銅斤料物統交歸併之廠其機件先儘各省原有者應用實有不敷再行酌調均照數登記作爲存本其餘停鑄省分之機件廠屋仍飭酌量修改以爲製造他項之用餘利一項由各省認爲練兵經費及各該省學堂新政之用國家本不應屑屑於此是以臣

等前奏請停蘇州鑄廠內卽將該廠所認練兵經費停解由臣部另籌此次歸併專爲維持國法起見自不應多鑄國利凡從前以餘利爲籌款者應查照臣等前奏另行籌畫以維大局惟鑄廠雖經歸併如辦理得法餘利不致盡無仍應內外兼顧每年結算之日除開支局用薪紅外實得餘利提出四成作爲練兵經費餘仍歸各省照限制成數派撥卽歸併停鑄省分亦得按照均分屆時刊印清單宣示並准各省派員查核以示公溥惟向來無局廠之省分不得援以爲例歸併之際其部署承接查核機料事體極爲繁重應請 欽派大臣隨帶司員前往考查辦理惟雲南一廠開辦最晚規模較隘卽由該大臣遴員前往毋庸親往接收以期安速茲將接收時應辦各事宜另繕清單恭呈 御覽如蒙 俞允臣等隨遵照辦理得 旨著派陳璧前往考察辦理○是月英吉利國新簡駐華使臣朱爾典抵任

八月乙丑朔以陳名侃爲都察院左副都御史○丙寅 上御乾清宮英國使臣朱爾典覲見呈遞國書○丁卯予故廣東瓊州鎮總兵蔡標優卹祀戰功事蹟交國史館立傳○諭自鴉片煙弛禁以來流毒幾徧中國吸食之人廢時失業病身敗家數十年來日形貧弱實由於此言之可爲痛恨今朝廷銳意圖強亟應申儆國人咸知振拔俾祛沈痾而蹈康和著定限十年以內將洋土藥之害一律革除淨盡其應如何分別嚴禁吸食並禁種罌粟之處著政務處妥議章程具奏○戊辰祭 社 稷壇 上親詣行禮

○上奉 慈禧端佑康頤昭豫莊誠壽恭欽獻崇熙皇太后幸頤和園駐蹕○辛未夕 月於西郊○壬

申 慈禧端佑康頤昭豫莊誠壽恭欽獻崇熙皇太后 皇上御仁壽殿英國使臣朱爾典帶領水師提

督默爾親見○癸酉張紹華病請解任允之○以吳匡為山西布政使丁寶銓為山西按察使○甲戌

上詣 奉先殿 壽皇殿行禮○乙亥禮部奏光緒三十一年八月直隸總督袁世凱等奏准停止科舉

摺內所稱舉人五貢三科內令各省督撫每三年一次保送若干名略照會試中額加兩三倍送京考試

凡算學地理財政兵事交涉鐵路礦務警察外國政法等事但有一長皆可保送俟考試時分別去取等

語竊思保送舉貢事屬創辦各省道途遠近不一若非先立標準未免無所適從 等語加細繹原奏所

請三年一次仍係規仿三年大比且意在疏通簡學具考試年分及起送赴考各節自應查照會試舊章

參酌辦理惟會試中額向由 臣部開歷屆比較單奏請 欽定此次加額保送擬請即以二十四年戊戌

科 欽定會試中額為斷於本額外再加三倍以廣登進至 臣奏統言舉貢實則核計各省舉貢以原保

送者究屬舉佔多數貢居少數擬以舉四貢一分別計算宗室由宗人府八旗由都統各省由督撫按照

原奏遴選長於算學地理等科如額保送造具年貌籍貫科分清冊於年內咨部並分給該舉貢等咨文

統限明年二月到京親實投考屆期再將考試章程另行具奏得 旨如所議行○禮部奏本年二月政

務處奏准每科會試中式之貢士有未經覆試者有覆試後未應 殿試或 朝考者向例於下科補考  
今科舉既停擬請准令該員等取具同鄉京官印結赴禮部呈請已經覆試或 殿試者即開列所考等  
第甲第名次帶領引 見給予出身分別錄用未經覆試者亦請查照新章免其覆試引 見錄用等語  
今擬通行各省如有前項未經引 見人員統令於明年三月內到京取結赴部呈明由 部於考試保  
送舉貢場後將該員等另爲一班帶領引 見以免參差而廣 具仁得 旨如所議行○丁丑諭周馥  
陳燮龍電奏上海米少價貴請暫挪銀十萬兩採買並沿途免釐等語著照所請戶部知道○稅務處戶  
部奏光緒三十二年七月初二日准軍機處鈔交署兩江總督周馥等奏機製棉紗出口常稅擬請改照  
洋關稅則徵收華洋一律辦理一摺奉 硃批戶部稅務處議奏欽此據原奏內稱機製棉花出口光緒  
十七年總稅務司奉總理衙門飭照上海機器局布辦理查上海機器局布正光緒八年北洋大臣李  
鴻章奏定如由滬運入內地及分運通商各口轉入內地均在新關完一半稅每擔稅銀七錢概免內地  
沿途稅釐今本口常關於棉紗一項每擔祇收稅銀二錢並不完釐輕重懸殊擬請飭令貨商人等凡裝  
沙衛火輪等船出口棉紗無論常關洋關均照光緒十七年定章完納每擔七錢正稅概免重徵至常關  
出口棉紗定章不一小輪祇完常稅每擔二錢並不完捐北路沙衛等船另完每三擔一包之產地捐一

兩四錢又每包出口捐錢六百文通州崇明海門三處民船完稅外完出口捐六百文如改歸一律不惟於稅課有益於商人亦足以示大公將來改章出口棉紗一捐即可撤除無論是否華廠可決其無礙銷數等語查機製棉紗一項在新關須完每擔正稅七錢在常關則僅完二錢輕重之間所差甚巨本年運洋棉紗前據江海關道開報自正月起至三月底止共有四萬八千三百餘擔之多以每擔少徵銀五錢計之每年虧數約近十萬餘兩殊於稅課損失不少且如沙衛海船及通海民船所完稅捐各數合併計算與洋關七錢之數相去無多而小輪一項既援內地章程在常關完稅出口獨不照完內地之捐辦法亦未平允該督臣等擬請將機製棉紗出口常稅改照洋關稅則徵收自係爲整頓稅務起見應卽照准嗣後無論華廠洋廠凡機製棉紗運由常關出口者統照光緒十七年定章每擔完納正稅七錢概免重徵以昭畫一至原奏內又稱此項棉紗不完釐金者以小輪一項其餘沙衛大小民船仍分別完釐以後常關稅改照新關稅則增收所有捐局出口棉紗釐金已歸無著似應將民船項下增收者撥還釐局一節係屬兼顧釐金俾關稅釐捐兩無妨礙亦應准如所請如蒙 俞允卽由臣等咨行該督撫臣遵照分別辦理得 旨如所議行○己卯恩壽奏山西鐵路公司奏請鹽斤加價現據鹽商公稟食鹽加價有礙潞綢銷路查江西鐵路籌款因礙准綢停辦山西事同一例應請將山西鹽斤加價停辦以恤商艱飭山

西鐵路公司另行設法籌款下戶部議奏○學部等奏臣部於本年四月奏准考驗游學畢業生自本年  
始每年八月舉行一次業由臣部遵行各省並經奏請 欽派大臣會同考試在案現據各省咨送應考  
學生陸續到京亟應議定考驗章程以憑辦理查上年考驗游學畢業生辦法因其時科舉未停學部未  
設據照鄉會試覆試之例奏請在 保和殿考試本係一時權宜之計現在科舉既已停罷又值 朝廷  
綜核名實振興百度之時自應妥議章程悉心考驗臣等詳考外國制度大都學成試驗與入官試驗分  
爲兩事而條理實相貫通故當其就學初未嘗有得官之心及其入官亦未聞有不學之士教育之所由  
精進政治之所由修明胥基於此 臣部此次考驗游學畢業生卽各國學成試驗之意擬酌照奏定分科  
大學畢業及高等畢業章程由臣等會同 欽派大臣按照所習學科分門考試務求詳密試畢酌擬等  
第帶領引 見恭候 欽定分別給與進士舉人等出身俾人人皆知其隆重仍將某科字樣加於進士  
等名目之上以爲表識而資獎勵京外衙門可就所分之科分別調用加以試驗奏請 錄用實官庶幾  
循名責實各盡所長用副 朝廷因才器使之至意得 旨如所議行 考驗游學畢業生章程 一考  
試分兩場第一場就各畢業生文憑所注學科擇要命題考驗第二場試中國文外國文 一第一場每  
學科各命三題作二題爲完卷第二場試中國文一題外國文一題作一題爲完卷 一考卷由襄校分



閱評記分數再由學部大臣會同 欽派大臣詳細覆校分別最優等優等中等 一畢業生者列最優等者給予進士出身者列優等及中等者給予舉人出身均由學部開單帶領引 見請 旨 一畢業生准給出身者並加某學科字樣習文科者准補文科進士文科舉人習法科者准補法科進士法科舉人醫科理科工科商科農科仿此○癸未以陳啟泰爲江蘇布政使世蕃爲安徽按察使○以左孝同爲宗人府府丞○甲申商部奏近百年來環球各國藝術競興新法新器月異而歲不同綜其要端舉凡農業工藝機器製造等事靡不進步甚速收效甚鉅中國地大物博聰明才力不難傑出乃通商垂數十年雖經次第仿辦惟咸拘守成法未能改良標異推陳出新而每辦一事需用機器原料須取給外洋故進口洋貨日增而出口者僅恃生貨一經製造販運來華遂獲鉅贏坐使利源外溢漸成漏卮推原其故豈皆辦理之未力殆亦提倡之未盡其道也查歐美當二百年前所有新法新器絕少發明自英國首定勸新法製新器者國家優予獎勵之例自是各國踵行其獎勵最優者乃至錫爵此例既頒人人爭自琢磨講求藝術每年可出新器多至千數百種論者謂歐美實業盛興其本原皆在於是現在 臣部工部局日漸擴充勸工陳列所卽須開辦事宜因勢利導設法提倡其有創製新法新器以及仿各項工藝確能挽回利權足資民用者自應分別酌予獎勵 臣等公同商酌謹就現在亟須提倡各端擬訂獎給商勸章程

八條各按等級給予頂戴山 部奏請 賞給現在中國工藝尚在幼稚之時如章程所載製造輪船鐵路橋梁以及電機鋼鐵等項一時尙難其人不得不稍從優異以資鼓舞振興等自當隨時嚴核所造之品果係精心自造確能及格方予奏請 頒賞以昭慎重允之○戊子予湖南善化縣孝女凌德芳旌表○趙爾巽奏奴才前於奉省應添設縣各治派員試辦摺內奏明擬於錦縣之江家屯添設通判一員名曰江家屯撫民通判欽奉 硃批著照所請吏部知道欽此當即欽遵轉行去後茲據試辦委員同知將文熙稟稱業將界址會同錦縣劃定其新治地段皆在錦縣以西界限分明毫無攙雜等情前來奴才覆查錦縣連西地段既已劃歸擬設之通判新治似應更名爲錦西撫民通判較爲該括且顧名思義亦足昭核實而定服從下吏部知之○庚寅 慈禧端佑康頤昭豫莊誠壽恭欽獻崇熙皇太后 皇上御仁壽殿日本國王壽博恭等覲見○甲午賞朝陽安定西直門外粥廠及藍靛廠資善同仁廣仁堂等粥廠煖廠米石

九月丙申命載振徐世昌往奉天吉林查辦事件○諭軍機大臣等趙爾巽奏奉省應辦事宜爲難情形一摺奉省爲根本重地百戰瘡痍列強環集經營措置動多棘手覽奏殊深慮慮所有練兵理財以及農工商業均爲刻不容緩之圖該將軍苦心經營力任其難務卽認真籌辦至所稱應用人員著准其奏咨

調往以資任使所需款項著隨時咨商戶部設法協濟至一切用人行政遇有應行變通成例之處著卽詳酌情形奏明辦理當此時局艱危該將軍受效重任責無旁貸惟當竭力圖維用副委任將此諭令知之○丁酉實法律學堂圖書集成一部○庚子賞外城玉泉菴育嬰堂等粥廠並崇善堂悅生堂等粥廠煖廠米石○壬寅以錢能訓爲巡警部左丞裕厚爲巡警部右丞劉彭年爲巡警部左參議吳廷燮爲巡警部右參議○癸卯 慈禧端佑康頤昭豫莊誠壽恭欽獻崇熙皇太后 皇上御仁壽殿各國駐京使臣等覲見賜遊宴○乙巳諭朕欽奉 慈禧端佑康頤昭豫莊誠壽恭欽獻崇熙皇太后懿旨禮部奏萬壽聖節禮儀一摺十月初十日萬壽在儀鸞殿受賀停止筵宴其在外之公主福晉命婦著照例行禮餘依議○丙午前任西甯辦事大臣烏魯木齊都統豫師卒賜卹如例○賜遊學畢業生陳錦濤等三十一人進士舉人有差○己酉 慈禧端佑康頤昭豫莊誠壽恭欽獻崇熙皇太后 皇上御仁壽殿各國公使夫人等覲見賜遊宴○庚戌岑春煊奏廣東籌辦粵漢鐵路前因商民集股有成舉定總辦各員經臣奏明請歸商辦嗣後迭次電請外務部代奏光緒三十二年閏四月二十四日承准軍機處電奉 旨岑春煊電奏悉昨已有旨諭令督商籌辦如果原舉各商結實可靠卽著實成該署督認真督飭妥籌辦理總期早日開工有裨路政欽此當卽欽遵督飭籌辦各商聞命之下歡聲雷動外省外埠爭先電匯路

股據鐵路公司總辦在籍道員鄭官應等稟報截至本年閏四月三十日停收股份止共收三成小股銀八百八十一萬七千五百六十二元以每股五元伸算實已認集股本銀四千四百零八萬七千八百一十元爲數之鉅認股之速實爲中國辦公司以來所僅見斯皆仰蒙 聖明垂念路政體恤輿情凡屬商民莫不感激思奮用能驟集鉅款踴躍成臣以路款既已充裕總辦亦經舉定自應欽遵 諭旨交商接辦以期早日開工經將原收義商合興公司交存材料物產於本年五月初二日派員點交商辦鐵路公司接收其前項物產及已成之省佛三水枝路行車溢利均係三省公共之業並令鄂省派來之湖北補用道存濟湘省派來之在籍翰林院編修蕭榮爵公同點驗管理商辦公司既經成立則以從速開工爲要義惟路工之良窳視乎工師之能否得人據該公司請調北洋工程師詹天佑回粵勘辦路工經臣奏奉 諭旨允准嗣由督辦山海關內外鐵路大臣袁世凱等以詹天佑總辦京張鐵路工程正在喫緊奏請仍留辦理京張路工咨會轉飭遵照旋據該公司另請電調幫辦京張路工道員鄒福謀回粵辦理粵漢鐵路工程復由臣電咨袁世凱飭令該員回粵據該公司稟准札委充當總工程師並飭將路工迅速勘明刻日興築在案查商辦公司按照商律應由衆股東選舉董事人員總持綱領並舉查察查帳各員稽查一切經各股東先期宣布於七月初一日集衆投簡公舉以多數取決計舉定董事十一員

查察兩員查帳三員所舉董事人等姓名據該公司稟經咨報商部註冊嗣因原舉董事第十一名之華益公司並無姓名核與商律不符應即扣除卽以其次之梁浩廷推補又原舉董事羅星橋一員查察唐彤階一員續由各股東查有冒名瞞舉情弊聲請復將其次之方營亭何荊祿二名分別揆補亦經報明商部立案此粵漢鐵路交商接辦電調工師選舉董事之情形也伏查粵漢鐵路聯貫鄂湘粵三省軌道綿互工程浩大將來與京漢鐵路接軌實爲南北往來要衝此次粵省商民力圖公益踴躍集股俾路事得以藉手免致啟外人覬覦之心其保全利權裨益大局實非淺鮮現在公司既立董事各員亦經舉定所期在事人等辦理悉遵商律部臣疆吏合力維持庶幾早日告成以仰副 朝廷興舉路政之至意下部知之○辛亥頒給山東 大王廟匾額並予河工出力之堯沂曹濟道胡建樞等獎敘有差○壬子命張人駿請 河神廟敬謹祀謝並予辦理河工之河南布政使瑞良等獎敘有差○乙卯奕劻孫家鼐張鴻燾奏等伏讀七月十三日 上諭時處今日惟有及時詳晰甄核仿行憲政廓清積弊明定責成必從官制分別議定次第更張等因欽此又伏讀十四日 上諭昨已有旨宣示急爲立憲之預備飭令先行釐定官制事關重要必當酌古準今折衷至當纖悉無遺著派載澤等公同編纂悉心妥訂並派慶親王奕劻等總司核定候旨遵行以昭鄭重等因欽此仰見 皇太后 皇上力拯時艱追變宜民之至意

率土臣庶感頌同聲實中國轉弱爲強之關鍵茲事體大臣等仰懇 聖謨總司核定斷不敢草率從事亦不敢敷衍塞責月餘以來准釐定官制大臣載澤等陸續送到草案臣等悉心詳核反覆商榷間有未協次第更定京內各官現已竣事竊維此次改定官制既爲預備立憲之基自以所定官制與憲政相近爲要議按立憲國官制立法行政司法三權並峙各有專屬相輔而行其意美法良則 諭旨所謂廓清積弊明定責成兩言盡之矣蓋今日積弊之難清實由於責成之不定推究厥故殆有三端一則權限之不分以行政官而兼有立法權則必有藉行政之名議制爲不平等之法律而未協輿情以行政官而兼有司法權則必有徇平時之愛憎變更一定之法律以意爲出入以司法官而兼有立法權則必有謀斷之便利制爲嚴峻之法律以肆行武健而法律寢失其本意舉人民之權利生命遂妨害於無形此權限不分責成之不能定者一也一則職任之不明政以分職而理謀以專任而成今則一堂而有六官是數人共一職也其半爲冗員可知一人而應官各部是一人更數職也其必無專長可見數人分一任則築室道謀弊在玩時一人兼數差則日不暇給弊在廢事是故賢者累於牽制不肖者安於推諉是職任不明責成之不能定者二也一則名實之不副名爲吏部但司籤掣之事並無銓衡之權名爲戶部但司出納之事並無統計之權名爲禮部但司典儀之事並無禮教之權名爲兵部但司緣營兵籍武職升轉之

事並無統御之權是名實不副責成之不能定者三也故臣等釐定官制通邊 諭旨上稽 本朝法度之精考參列邦規制之善爲主義而尤以清積弊定廣成漸圖憲政成立爲指歸首分權以定限立法行政司法三者除立法當屬議院今日尙難實行擬暫設資政院以爲預備外行政之事則專屬之內閣各部大臣內閣有總理大臣各部尙書亦爲內閣政務大臣故分之爲各部合之皆爲政府而情無隔閡入則同參閣議出則各治部務而事可貫通如是則中央集權之勢成政策統一之效著司法之權則專屬之法部以大理院任審判而法部監督之均與行政官相對峙而不爲所節制此三權分立之梗槩也此外有資政院以持公論有都察院以任糾彈有審計院以查濫費亦皆獨立不爲內閣所節制而轉能監督閣臣此分權定限之大要也次分職以專任分職之法凡舊有各衙門與行政無關係者自可切於事情首外務部次吏部次民政部次度支部次禮部次學部次陸軍部次法部次農工商部次郵傳部次理藩院專任之法內閣各大臣同負責任除外務部載在公約其餘均不得兼充繁重差缺各部尙書祇設一人侍郎祇設二人皆歸一律至新設之丞參事權不明尙多窒礙故特設承政廳使左右丞任一部總匯之事設參議廳使左右參議任一部謀議之事其郎中員外郎主事以下視事務之煩簡定額缺之多寡要使責有專歸官無濫設此分職專任之大要也次正名以核實巡警爲民政之一端擬正名爲民政

部戶部綜天下財賦擬正名爲度支部以財政處稅務處併入兵部徒擁虛名擬正名爲陸軍部以練兵處太僕寺併入而海軍部暫隸焉既設陸軍部則練兵處之軍令司擬正名爲軍諮府以握全國軍政之要樞刑部爲司法之行政衙門徒名曰刑部有未盡擬正名爲法部商部本兼掌農工擬正名爲農工商部理藩院爲理藩部太常光祿鴻臚三寺同爲執禮之官擬併入禮部工部所掌半已分隸他部而以輪路郵電併入擬改爲郵傳部此正名核實之大要也若是書責成既已明定積弊庶可廓清憲政規模實肇於此如以議院甫有萌芽驟難成立所以監督行政者尙未完全或改今日軍機大臣爲辦理政務大臣各部尙書均爲參預政務大臣大學士仍辦內閣事務雖名稱略異而規制則同行政機關屹然已定憲政官制確有始基矣抑臣等更有請者制法固求其盡善徒法不能以自行必能有辦事之精神而後有改良之功效要在大小臣工顧名思義視國如家無自私自利之心有任怨任勞之實各修職事共濟艱難庶仰副 兩宮孜孜圖治之懷下慰薄海嗚呼嚮風之望是則臣等與有責成尤不勝惶悚冀幸者也是否有當伏候 聖明裁擇 乾斷施行此次官制綱目固已粗具細節容有未盡周密之處應請 命下之日飭令各該衙門堂官按照所定大綱及本衙門應辦事宜自行酌議會同 臣等核定奏明辦理謹將內閣官制清單一件各部官制清單十二件各部官制通則清單一件各院官制清單六件軍諮府



官制清單一件閣部院官制節略法部節略資政院節略各一件共二十四件繕呈 御覽恭候 訓示

上諭朕欽奉 慈禧端佑康頤昭豫莊誠壽恭欽獻崇熙皇太后懿旨前經降旨宣示立憲之預備飭

令先行釐定官制特派載澤等公同編纂悉心妥訂並派慶親王奕劻等總司核定候有遵行茲據該王大臣等將編纂原案詳核定擬一併繕單具奏披覽之餘極衡裁擇用特明白宣諭仰維 列聖成憲昭

垂法良意美設官分制莫不因時制宜今昔情形既有不同自應變通盡利其要有在專責成清積弊求實事去浮文期於釐百工而熙庶績軍機處爲行政總樞雍正年間本由內閣分設取其近接內廷每日入值承旨辦事較爲靈速相承至今尙無流弊自毋庸編改內閣軍機處一切規制著照舊行其各部尙書均著充參預政務大臣輪班值日聽候召對外務部吏部均著照舊巡警爲民政之一端著改爲民政部戶部著改爲度支部以財政處稅務處併入禮部著以太常光祿鴻臚三寺併入學部仍舊兵部著改爲陸軍部以練兵處太僕寺併入應行設立之海軍部及軍諮府未設以前均暫歸陸軍部辦理刑部著改爲法部責任司法大理寺著改爲大理院專掌審判工部著改併入商部改爲農工商部輪船鐵路電綫郵政應設專司著改爲郵傳部理藩院著改爲理藩部除外務部堂官員缺照舊外各部堂官均改設尙書一員侍郎二員不分滿漢都察院本糾察行政之官職在指陳闕失伸理冤滯著改爲都御史一員

副都御史二員大科給事中著改爲給事中與御史各員缺仍暫如舊其應行增設者資政院爲博採羣  
言審計院爲核査經費均著以次設立其餘宗人府內閣翰林院欽大監鑾儀衛內務府太醫院各旗營  
侍衛處步軍統領衙門順天府倉場衙門均毋庸更改原擬各部院等衙門職掌事宜及員司各缺仍著  
各該堂官自行核議悉心妥籌會同軍機大臣奏明辦理此次斟酌損益原爲立憲始基實行預備如有  
未盡合宜之處仍著體察情弊隨時修改循序漸進以臻至善總之時局艱危事機迫切非定上下共守  
之法不足以起衰頹非通君民一體之情不足以伸疾苦所有新簡及原派各大臣實無旁貸惟當顧名  
思義協力同心盡去偏私共任勞怨務使志無不通政無不舉庶幾他日頒行憲法成效可期倘仍視爲  
具文因循不振則是上負朝廷下負國民不能爲爾等寬也將此通諭知之○諭朕欽奉 慈禧端佑康  
頤昭豫莊誠壽恭欽獻崇熙皇太后懿旨此次釐定官制據該王大臣等將部院各衙門詳核定擬業經  
分別降旨施行其各直省官制著卽行陸續編訂仍妥核具奏方今民生重困皆因庶政未修州縣本親  
民之官乃往往隔閡諸事廢弛閭閻利病漠不關心甚至官親藩友肆爲侵欺門丁胥差敢於魚肉吏治  
安得不壞民氣何由而伸言念及此深堪痛恨茲當改定官制州縣各官關係尤要現在國民資格尙有  
未及地方自治一時難以遽行究應如何酌核辦理先行預備或酌改佐治員缺並審定辦事權限嚴防

流弊務通下情著會商各省督撫一併妥爲籌議必求斟酌盡善候有遵行朝廷設官分職皆以爲民總期興養立教樂業安居庶幾播民和維邦本用副懷保羣黎孜孜圖治之至意○諭此次裁缺之堂官均著以原品食俸聽候簡用其裁缺衙門之實缺候補司員筆帖式或由他衙門調用或分別班次分發外省補用著吏部卽行妥議具奏○諭此次改定官制除民政部學部農工商部尙書侍郎均毋庸更換外吏部尙書仍著鹿傳霖補授左侍郎著陳邦瑞右侍郎著唐景崇調補度支部尙書著溥頤補授左侍郎著紹英補授右侍郎仍著陳璧補授禮部尙書仍著溥良補授左侍郎著張嘉亨調補右侍郎仍著景厚補授陸軍部尙書著鐵良補授左侍郎仍著壽勳補授右侍郎仍著蔭昌補授法部尙書著載鴻慈補授左侍郎仍著紹昌補授右侍郎著張仁黼補授郵傳部尙書著張百熙補授左侍郎著唐紹儀補授右侍郎著胡燏棻補授理藩院尙書著壽書補授右侍郎著恩順補授都察院都御史仍著陸寶忠補授副都御史仍著伊克坦陳名侃補授○諭朕欽奉 慈禧端佑康頤昭豫莊誠壽恭欽獻崇熙皇太后懿旨等奏煊奏查明粵省風災分別賑撫情形一摺本年八月初間廣東香港一帶及潮高雷廉欽等府州屬颶風猛烈溺斃人口損壞船貨災情甚鉅爲數十年來所未有覽奏殊深憫惻本年該省廣肇高欽等屬被水成災業經發帑賑恤此次風災情形尤重加恩著賞給帑銀十萬兩由廣東藩庫給發該督卽遵派委

員會同該地方官員紳士核實散放加意賑撫毋任流離失所用副廷軫恤災黎之至意○諭朕恭奉  
慈禧端佑康頤昭豫莊誠壽恭欽獻崇熙皇太后懿旨鹿傳霖榮慶徐世昌鐵良均著開去軍機大臣  
專管部務○諭朕恭奉 慈禧端佑康頤昭豫莊誠壽恭欽獻崇熙皇太后懿旨慶親王奕劻協辦大學  
士外務部尚書張蔭桓均著仍爲軍機大臣大學士世續著補授軍機大臣○諭朕恭奉 慈禧端佑康  
頤昭豫莊誠壽恭欽獻崇熙皇太后懿旨廣西巡撫林紹年著開缺以待即用在軍機大臣上學習行走  
○端方陳夔龍蔭昌電致軍機處淮海等屬伏莽素多際此災荒咸思蠲動八月二十間海州幫徒數百  
人肆行搶劫且將搶獲米糧半門該督希圖勾結飢民滋事卽經前署總督周馥會商飭派韓承福率步  
隊兩營馳輪在海屬濰河口羊山口等處嚴密梭巡以防竄越入海此外安東阜寧鹽城等縣亦各有匪  
徒聚眾滋擾均經嚴飭地方官會同防營認真查緝復查本年江北水災奇重各處災民無慮數十萬深  
恐被匪誘脅致釀巨患現在廣籌賑撫以定人心嚴飭緝匪以寒匪膽方到任查悉匪黨愈聚愈眾據有  
民船百餘隻分布各口持械拒敵又經與昌會商加派參謀鄧玉春率步隊兩營馬隊四棚衛隊三棚王  
曜率所部緝私營隊速往合力兜拿並派東海淮海水師各船分堵海口均歸鄧玉春節制調遣俾昭周  
妥一面酌派兵往會緝倘文武員弁辦理不力以致疎縱貽患當請從嚴治罪如有異常出力之員亦

常恩 恩給獎以靖地方 上諭軍機大臣等端方等電奏悉著督飭各員將災民妥為撫恤毋令被匪  
勾結仍嚴拿匪黨務獲懲辦以靖地方毋稍疎懈餘依議○以汪大燮為外務部右侍郎○命程德全辦  
理八省膏捐事務○以柯逢時為廣西巡撫○諭嗣後大學士尚書侍郎均著毋庸兼管都統副都統事  
務○以奎俊為總管內務府大臣並佩帶印鑰○以松壽為察哈爾都統○以沈家本為大理院正卿定  
其卿秩正二品○諭軍機大臣等現在改定官制所有各衙門仙日次序另行更定著各衙門遵照○內  
辰轉營署為宗人府左宗正以邊斌為宗人府右宗正訥勒赫為宗人府右宗人○派載澤管理武備院  
事務陸潤庠以尚書兼管順天府府尹事務○以劉若曾為大理院少卿定少卿秩正三品○調景恩為  
正白旗滿洲副都統以張英麟為鑲黃旗蒙古副都統陸廉為正黃旗漢軍統領崇壽為正白旗漢軍副  
都統溥潤為鑲紅旗漢軍副都統調載澧為正紅旗滿洲都統以觚興為正白旗漢軍副都統調訥勒赫  
為鑲紅旗滿洲都統以清銳為鑲黃旗蒙古都統呂海寰為正黃旗蒙古都統琦寶為鑲紅旗蒙古副  
都統特圖慎為鑲黃旗蒙古都統景澧為鑲藍旗漢軍都統調樸壽為鑲藍旗滿洲副都統李殿林為正  
白旗漢軍副都統○丁巳魁福請解任允之以額勒和布為察哈爾副都統○調溥偉為鑲黃旗蒙古都統  
清銳為正黃旗漢軍都統○改政務處為會議政務處○諭翰林院為文學之班都察院有獻替之責該

堂官及所屬各官均應量予津貼用示體恤嗣後翰林院舊每年賞銀三萬兩都察院舊每年賞銀四萬兩由度支部發給著該堂官自行酌定數目其編檢以上及科道各員一併分別勻給如有聲名平常不知自愛者即著該堂官隨時甄別摺實奏參以昭懲勸○諭都察院為朝廷耳目之官於一切政事關繫民生疾苦自應留心考核據實指陳近來科道等官識見通達議論純正者固不乏人而每舉細故無當大體者亦時不鮮茲當新定官制預備憲法之時該衙門糾察有責責任綦重務令舉能授官無忝厥職庶幾風忠益而通民情嗣後應如何激揚風憲整頓彙綱以及保送御史應如何增加遴選嚴定考成使無濫列之處著軍機大臣大學士各部參預政務大臣會同都察院堂官一併妥議具奏○戊午民政部奏查前經奏定三部章程聲明巡警學堂歸三部運轄等因欽奉 諭旨允准在案伏維保安之用警政為先造端之方學程最要現在整理內外城警政需用警官以下人材日多加以各省舉辦巡警多因任使不敷或咨請調員前往或電請派人來學尤非亟設高等學堂分科教授不足以宏廣迪而資應用當於四月間招集京外人員及貢舉生監並原充各項巡警考試共有六千餘人之多復派精通警學各員嚴加甄錄由高等校核計挑入正取二百四十名副備取三百名先將列在正取者令習學肄業計分三科一曰正科授以高等警察及各項法律分六期畢業凡挑取舉貢以下及巡警入之一曰簡易科授以

簡易警察以應急需二期畢業凡挑取各官員等入之一曰專科授以必修警察俾現有差各警員可及時來學分二期畢業凡各屬隊警官以下入之說原有警務學堂房院酌加修葺應有室舍亦均粗備名曰高等巡警學堂延聘中外各科教習酌定課程以資講授查有二品銜分省補用道唐家楨堪以派充該堂總理並派軍部警學司員外郎熙棟總核該堂事宜提調以下各員均經揀派並酌設司書生夫役名額其經費等項飭令核實動用撥歸支業於本月初十日開辦至京師號稱首善學堂又為各省標準現因款項支絀僅就財力所能及者辦理嗣後仍當籌增款項設法恢張以期學業日精成材日衆內足供京城之選用外能應各省之取求上副 朝廷設立專官保衛元元之至意得 旨如所議行○日本歸我營口等中日委員會訂定收營口條款 一按北京所訂另單第一條載明營口地方於日本軍隊未撤以前凡關乎驗疫防疫等事應由地方官與日本領事官商訂章程等語現今兩國委員商定暫時即按日本軍政官所訂章程辦理倘日後查有應行更改之處即由地方官會同日本領事隨時商改俟日本軍隊撤後即由中國地方官自行主持辦理 一按北京所訂另單第二條載明凡於軍政時代內所有業經開辦或已籌畫而未經開辦之公益事宜應由地方官接辦或允歸其承辦等語查日本軍政官前已允許日清合辦株式會社開辦營口自來水電氣車電氣燈電氣四業現經兩國委員商定自

來水電氣車電氣燈司山該會社承辦但須將該會社原定一切章程呈送北京應管之部立案倘該部  
檢查此項章程有應行更改或應添減之處該會社允爲遵照辦理自來水一業添股之時必須先儘華  
人電話一業乃中國電報局專利應由中國電報局收回自辦卽由該局與該會社彼此各派一員會同  
查看該會社在營口已經製備所有電話產業估價照購倘彼此委員意見不同應由該局與該會社隨  
時公舉一局外之公正人由伊定奪彼此遵守屠獸場一事應由衛生局接辦至如何估價購買卽照電  
報局承購電話方法辦理由營口至牛家屯之輕便小鐵道俟電氣鐵道工竣卽行撤去凡關乎公益土  
木工程出於寓居該埠中外商人之同意由日本軍政官開辦或已籌畫而未經開辦者中國地方官允  
照接辦完工 一按北京所訂另單第三條載明警察及衛生事務應歸中國地方官管理務期盡善以  
保公共治安爲此兼用日本警察教習及醫生如有未盡妥洽之處日本領事官可告知地方官隨時酌  
辦等語現經兩國委員商定雇用日本警察教習及醫生除薪水外一切章程均按天津雇用日本警察  
教習及醫生一律辦理倘日後警察衛生辦理有未盡妥洽之處一經日本領事官函告應由地方官隨  
時酌辦 一凡軍政時代內所判斷訟事案件毋庸中國地方官再爲提訊所有判斷案件並登記等一  
切文卷應由軍政官移交地方官存案此項案卷另由軍政官備繕一分移存駐紮營口日本領事署



一按北京所訂另單第四條載明海鈔兩關事務應歸海關道管理清國政府將該兩關進款暫儲存於正金銀行將來戶部銀行分別開設之後於兩國銀行儲存等語現經兩國委員商定稅款於中國度支部銀行未設以前儲存營口正金銀行如何辦法應由該營之地方官與正金銀行彼此議定 一營口日本軍政准定於明治三十九年十二月一日即光緒三十二年十月十六日全行撤去○轉楊士琦爲農工商部左丞以熙彥爲農工商部右丞轉著齡爲農工商部左參議以沈雲沛爲農工商部右參議○庚申 上奉 慈禧端佑康頤昭豫莊誠壽恭欽獻崇熙皇太后還宮○辛酉命袁世凱飭大順廣道文沛慶詣李連莊高村黃莊 大王剛敬詣祀謝○壬戌以朱家寶爲外務部右丞楊樞爲外務部右參議○是月比利時國新簡駐華使臣柯甯雅抵任